

四


博士詩

和州詩





文博士先生詩集序



夫詩言志也為詩不以志即馳聲騁調足以博名高不足以攄性靈胡談古詩者動援屈宋然所擬不過蘭林鸞鳴招魂筮夢之類以為屈宋在是乎語近體者動推少陵然所襲不過乾坤宇宙百年萬里之類以為少陵在是乎吾吳號為文獻者千秋

於茲矣國初高楊張徐並稱作者迨文太
史與徐迪功相先後雖聲調殊塗而氣韻
懸合亦各言其志而已當時有同聲相和
之美無文人相輕之嫌則猶存古之道也
降是則家珠人璧異同紛出伸彼則抑此
自高則卑人雅道日漓良可慨矣國博既
善其箕裘而又心無城府言無畦徑克乎

陶韋之徒也願不習為苦吟不多易稿或
對客立就或散步率成任興揮灑好事者
珎其片隻爭相持去存者僅二十之二三
耳夢珠彙其家集遠自高曾近至父叔將
以次登梓乃窮搜遍錄彙以成集因以和
州詩附焉和州師友父兄出入獻吉郁
彬二媿美眉山棠棣相輝於簡帙即墳篋

並奏於堂序矣夫夢珠以弱冠矣鄉書以
文華建旗鼓其取青紫樹勲猷所以光先
君之令德者固自有在其善繼述續謨烈
所以發前人之未發者又自有在而獨於
累葉之詩若惴焉惧其遺失者其用意深
遠惟可與知者道不當與隨人道短長者
語也不佞幸蚤登太史龍門即荷國博和

州二先生引為忘年交至錄事伯仲尤號
為莫逆受知者四世是稱通家非若魯司
寇孫遠援周柱史而已故敢僭為先駟并
識所感云

萬曆戊子春日張鳳翼伯起謹序

書文博士和州詩集

門下士張獻翼幼于敬撰

夫韋有玄成而孟益尊鄭待小同而玄益著賈得嘉而誼以經術起者不衰盧籍謀而植以儒學用者不墜故潁川陳氏時人謂之公慚卿二慚長非以世其家業不殞者之難乎然未有父子兄弟祖孫歷代名

德並有集行於世如文氏者也予少而多
長者之游即生晚不及見涑水公幸及見
括囊稿若於太史公為王父行於博士和
州公為父行即於錄事公伯仲稱群紀交
視錄事公猶然十五年以長太史公嘗倒
屣授書博士和州公則同為諸生忘形尔
汝居無何博士公為國子先生余方太學

遊士又出博士公門誼至廢弟子禮逮與
孝廉諸仲稱兄弟而奕世交情綿及五世
豈偶然哉錄事公冠履詩書佩服圖史思
仰興絕風傍嗣逸業乃搜採父叔遺稿而
梓之以揚清芬以頌世德安知非玄成小
同之倫歟寧特賈誼盧植諸君有後乎君
子謂其愛禮近古矣二公之為詩也輝諱

樣草契協墳簞或語取暢心不由雕飾或
占惟信口奚假深湛是以每出新意而悉
去陳言不襲古調而頓超時格殆無意求
工而自然追雅矣間嘗與二公庭下聞詩
輒云詩取發乎性情止乎理義若光羲之
真率居易之平淡皆可比陶韋庶幾雅道
又嘗云守茂陵之園索長安之米亦足陸

沉然非所好是以六百滿而邴生行三迳
荒而陶令去不能奪尊鱸之思不能挽扁
舟之興不惟父子二疏兄弟求點自涑水
公以至錄事伯仲人二季膺世二陶令嘻
亦竒矣且以文名世造物所忌即位不登
於崇品而年並躋於上壽源遠乎哉吳自
橈雲而後往二有兄弟齊名者茲集也謝

氏蟬聯迭為靈運劉家紈袴互作孝綽余
兄弟侈登龍之榮叙雕龍之慶豈其要之
亦惟勗之而已

明文博士詩集上

兩京國子博士文

彭壽承

九日遊石湖次白二貞夫韻

重陽誰泛石湖船秋水平吞萬里天翠管銀笙空外
沸牙檣錦纜鏡中牽西風着意吹烏帽紅葉如花落
舞筵痛飲狂歌非慢世江山佳節自年年

宴徐太傅園亭分得才字

高會追金谷諸公總上才名山當戶列細雨拂簾迴
把酒巖花落彈棊水閣開馬蹄歸獸緩知是習池來
碧峰寺分得襟字

地勝牽幽興僧閒澄道心昔年曾寄跡今日復登臨
杉檜丹青古雲霞殿閣森慚余羈旅客乘醉一披襟

和王二履吉湖上八絕

履吉讀書治平忽枉八絕恍然興故山之想
書云壽承故山侶也或能嗣響乎因而和之
春到江南何處好石湖山水畫圖開新蒲嫩柳一時
綠鷓鴣鷓鴣無數來

三月暮春湖水平拖藍潑綠映空明青天倒映芙蓉
障畫鷁徐飛錦繡城

白鷺群飛天倒開波搖山動水縈迴峭帆羨殺乘風
舸何啻張騫槎上來

茶磨楞伽疊翠屏汀州蘆筍立鷓鴣白雲輕薄搖波
淨黃鳥丁寧喚酒醒

山壓晴湖水映山游人日暮不知還行春橋上好風

景綠樹紅花滿目斑

腸斷春湖新水流傾城兒女踏青遊郊臺不識吳王
事指點楞伽最上頭

一簇桃花紅欲然數株楊柳綠生烟柰可春光留不
住桃花零落絮漫天

山西緋桃太含胡竹裏斑鳩逐隊呼形勝有餘心獨
苦王符閉戶草潛夫

別徐允升次段子辛韻

君昔毗陵別余今白下歸帆飛大江月塵拂帝京衣
心逐冥鴻杳愁添落葉稀百年渾去住何必更依依

江中曉望

萬壑爭趨勢獸尊金焦東下海爲門朝霞浴日霧欲

明倫彙編 家範典 卷一百一十一
滅秋氣橫空天倒吞荆楚仲宣頻作客沅湘正則幾
招魂 聖朝自媿獨貧賤滿目江山總淚痕

丹陽道中同嘉弟

昨夜乘潮發建康今朝潮落又丹陽天南星斗隨沙
鳥江上風烟憶故鄉去住此身元不定飄零吾道孰
行藏同舟爾亦同淪落對酒無言淚兩行

送華從龍會試

萬里關河雪霰侵送君北上意何深風雲已奮驂
道霄漢猶懸鴻鵠心京國飛騰誰得似天涯流落獨
難禁曲江見說花如錦此日春風滿上林

陸原大書舫清游卷

不繫身如汗漫仙左圖右史米家船白鷗飛盡青天

杏讀到南華秋水篇

立春日同彭孔加過袁與之桃花別墅

愛爾桃花塢臨溪新草堂烟籠寒篠翠風轉野梅香
積雪留殘白垂楊試淺黃山公行樂地時許野人狂
春日尋幽賞行行路轉迷忽驚高柳變似聽早鶯啼
翠桁依危峙紅橋度淺堤卽看新水滿疑入武陵谿

新鶯

霏霏拂地柳千條烟鎖紅欄十二橋最愛新鶯初出
谷綠絲叢裏一聲嬌

雨中懷段力部兄弟

久雨惟饒睡高樓苦憶君遙憐前夜月只隔一溪雲
碧映船窓水香林綺幙芸有懷吟不就空自惜離群

九日同王履約履吉過呂氏竹園

不作龍山會同游呂氏園流雲度秋水修竹隱週垣
碁局隨幽磻茱萸照酒罇琵琶彈一曲一聽一消寬
華從龍邀遊石湖不赴次韻

不到石湖今幾時故人有約竟愆期非緣心亂辭蓮
社却羨山公醉習池

卧雲室

白雲罨層簷空濛浩無極一臥三十年去來本無迹
仰睇見飛揚會心自有得欲往從之游雲深不可測

贈徐子仁

金陵帝王居佳氣鬱以蒼幽人無外慕迹含其童
結廬城之南謝喧聊尚羊鳥鳴青松下揮塵白門傍

芳蘭轉光風蕙帳霏芸香纖鱗時泳躍翠羽恣翱翔
對此忘利達日澹心彌良身逢明盛時雅志羞巖廊
默坐草太玄高臥同羲皇朗咏太冲篇遠慕淮南王
至理已云得壽芹日以強逍遙塵寰中此樂殊未央

虎丘納涼

六月不堪城市暑避喧聊復虎丘行珠宮錯落涼飈
轉金磬瓊瓏午氣清阮藉竹林非傲世幼輿丘壑自
多情莫嫌歸棹遲遲發悟石軒前月已生

王繩武同游長干寺

寶刹長干外登登紫夢長曲池縣玉澗幽逕落天香
旭日搖金塔纖雲擁画廊偶同王子敬看竹到山房

金陵雜歌十絕

鐘山屹立群山趨虎踞龍蟠天下無一代輿圖占曆
服萬年形勝屬皇都

臺城宮闕鬱相望金釭壁帶生輝光可憐侯景稱兵
日尚講空門滅性章

段岡三日紀吳功皇象竒書後代崇雨蝕苔侵荒草
合何人移置大成宮

沈約才華擅一時郊居作賦儉爲師野人指點東田
宅猶說梁王受禪詞

遁跡鐘山事隱棲玄猿白鶴草堂低一朝出處違初
志千載移文憶釋圭

南朝諸寺石南門四百八十今誰存可憐惟有長干
殿金碧參差勢獸尊

陶公掛冠神武門華陽自築貞居室逃名那復論世
事笑殺尚平婚嫁畢

樂遊苑裏夜啼烏習家池邊春草枯何人得似山公
醉試問高陽舊酒徒

蔣山松栢鬱蒼蒼昭明讀書臺已荒芟煩畧穢見刪
述金輝玉映垂琳琅

桓伊一日聲輝赫騎從聯翩將遠適青谿橋畔逢王
郎下馬停車三弄笛

人日竹堂看梅

今年春色早人日見梅花香入禪房靜影隨初月斜
折來烏几亂看去白雲賒東閣無由到詩成惠遠家
仲春履吉與之永之小集得草字

二月集嘉賓駘蕩春光早白日墮游絲黃鳥鳴聲好
玄言互剖析至理窮深討觥籌雜咲歡高懷自傾倒
落霞尚遲留初月出杲杲雖無陳遵投亦有魏公掃
相期終南山去拾金光草

賦得蔺寂觀送盧師陳兵部

九江秀色結匡廬終靜誅苑此卜居苦竹只今遺往
蹟斗壇無復拜荒墟揮毫定接宣城筆梳羽咸看司
馬車王事有程留不得却將佳麗付圖書

聽鄰舟吹簫

風急船難進春寒酒易消他鄉頻作客何處忽吹簫
近水聲偏細凌虛興自豪可憐羸女思飄泊在江臯
舟中與顧貞叔夜話

燭短光猶白茶傾火尚紅論心聽夜雨把袂怯春風
浩浩江湖濶茫茫宇宙空茆山明日上羨殺葛仙翁

雨中過紫陽橋

狂風驟雨濕征袍據蹇微吟興亦高只恐前身同鄭
五灞橋何似紫陽橋

道中望上宮

策蹇行行路轉深上宮臺殿鬱森森朱旛縹渺雲中
影玉磬瓊瓏空外音丹竈有時窺白鶴砂牀何日試
黃金我來欲訪茆君跡古洞雲封不可尋

題折枝桃花

折得桃花拂袖香美人含咲立東墻無言亦自成蹊
逕解語爭教不斷腸

題芭蕉士女

雲髻水肌態橫生，鈿階瑤砌照人明。
午窓夢醒渾無事，閒看芭蕉獨自行。

予既和履吉八絕，因思湖上四時之景，有不減於春者，摘其可愛，更賦六首。

朝霞明滅起來遲，爽氣氤氳獨立時。
紅日未昇湖水淨，五雲翻映碧琉璃。

飛霞散綺日欲落，須臾星斗生。
光芒鳴榔何處漁歌起，款乃先聞餘韻長。

月色湖光相盪射，好風吹送水香來。
金鱗翠鬣漁人事，擊鼓澄波似可哀。

五月山頭梅子肥，絲絲細雨隨風飛。
衝泥簞笠橋頭

望得意，漁舟先自歸。

久雨初晴花滿烟，水清沙白靜涵天。
雙飛燕子歡相語，對浴鳧鷖喜並眠。

飛雪堆山山失翠，動搖湖水白爭光。
虛疑柳絮春風惡，却喜梅花吹噴香。

舟中望靈岩

方舟下橫塘，並駕趨玄墓。
出郭未十里，而與靈岩遇。
江山信有靈，塵囂已殊路。
玄雲接琴臺，朱藤緣狡兔。
吳王昔全盛，離宮矗無數。
宸遊無定居，鑿輿此恒駐。
飛甍臨絕巘，曲水蒼龍渡。
凝雲遏清響，繁花映華輅。
廊餘響屨名，洞遶西施步。
一旦市朝變，荒烟滿山樹。
繁華不須臾，倏忽譬朝露。
彼美五湖人，終為脫塵霧。

擬古

大明觀賜谷納照稱物情商飈起天末而有巨細聲
造化靡所私物我自不平至道無端倪六合隨虧盈
一有不足者中心勞逢邈卓哉仲尼徒千秋誰與京
蒙莊與李耳終令後世輕

彈琴虛窓下悠悠太古心吾意有所感孰審少原簪
蚩蚩市中兒知聲不知音鍾生伯子感荷蕢孔所欽
此道久寂寞千載和氏琛鼓希默然坐泪落沾羅襟
仰睇浮雲征俯觀江漢流浮雲飛不定川流去不休
俯仰既如此吾亦何所求人生在世間倏忽譬蜉蝣
雖非金石堅百年寧悠悠往者不可及來者猶可修

石頭城

鍾山開帝宅天塹控神州夾道朱樓擁摩空貝闕浮
興亡餘六代形勝屬三秋書劔十年夢蹉跎亦壯遊

雙林里

幽人樂大隱卜築雙林里翠樾落重陰清風散虛几
誰能受拘纏吾道任張弛考槃澗之阿于以忘清紫

侍顧華玉丈上方玩月

晨策入石湖落景憇上方上方連嶠嶂疊障通河梁
窈窕入深谷崎嶇陟崇岡秋深氣蕭瑟雲薄天蒼涼
萬木振長風羣卉彫嚴霜遐觀諧夙心周覽窮八荒
徑仄步逶迤崕傾身低昂緣葛采石筆捫蘿拾蘭芳
矯首睇飛鴻俯視空茫茫皇皇殿閣森霏霏靄霧黃
望望皓首白耿耿銀河光坐久涼颼集泫露沾衣裳

佳會合章縫友朋亦孔良綠醕何淋漓各舉浮白觴
自憐骯髒骨零落同高陽邂逅山公醉容我禰衡狂
山水能娛人爲樂殊未央夜靜心益閒天籟雜鳴蜩
安得孫登徒長嘯和鸞皇何如王子晉緱山吹笙簧
懷哉鳴夷子功成謝岩廊眷言仰前修千載永相望

懷石湖

不到石湖三十日猿驚鶴怨草堂陰竹林酒伴虛佳
會野寺鶯花廢短吟自是窮途多慟哭非關在坐少
知音平生性癖耽山水未脫樊籠違素心

訪雪次施侍御韻爲袁邦正賦

雪發山陰興須烹掃雪茶玄談消世慮淑氣動春華
玉漏香沉燼青燈夜吐花孤吟成底事句穩足生涯

徽州吳君得妙法製墨賦詩贈之

新安松枝燒不絕紅霞碧焰相糾結收烟調搗三萬
杵練作玄霜烏玉玦設來几案對端侯雲浮烟散光
澄澈落紙三年不昏暗一點霜紈漆無別廷珪已矣
潘谷死此道只今誰得比水晶宮客汪廷器吳郎繼
之真二美時時贈我兩三丸光黑異常心獨喜日日
用之無間斷經歲方能半寸毀黃金可得柰墨無莫
輕目前惟重耳嗟余不欲磨世人願得一咲臨池水

訪顧子諫龍石山居

愛爾村居好幽栖興不窮晚烟凝樹白霜葉映山紅
飯煮香秔稻茶烹顧渚封明朝向城市不必念泥鴻
夜宴子諫書齋啓窓見月喜而再賦

明文正公詩集上
徑僻無人到柴門夜不關清樽開綠醕白月掛青山
室靜心逾妙香銷意亦閒無論去與住且復破愁顏
送陸幼靈宰攸縣

非角卽相知老大傷離別離別未足惜所悲在歲月
歲月不我待種種已白髮憶昨少小時所志在功業
悠悠卒無成興言忽心熱送子雖云遠長沙亦宦轍
親民惟令尹吾道在用拙能寬一分益定有近者悅
貧賤吾常事衣食不苟缺富貴自有時榮華易消歇
世人徒碌碌吾言非漫說執手無他言相期堅晚節

新秋

樓居難避暑一雨掃煩蒸暫喜干戈洗欣看黎庶寧
涼風期白苧爽氣薄青燈筆硯雖堪近悲愁賦未能

湖上

開歲常懷湖上遊干戈阻絕未能翦水光山色依然
好紅葉青松無柰秋驅寇曾聞當日喜漁歌猶有昔
時愁獨憐鷗鳥汀洲上來往翻飛得自由

鷄林八景詩爲趙都諫賦

鳳皇山高插天青鳳皇山下雲冥冥雲消雨歇總無
迹疊疊烟嵐虛翠屏 右鳳山雨雲

皚皚白雪擁龍峯萬壑千岩在画中賞得新醅開小
閣褰幙正對玉芙蓉 右龍峯霽雪

傍郭青帘入望高酒香春暖思陶陶杖頭携得青錢
在更拉隣翁過小橋 右南郭酒旗

車輪馬足擁飛塵來往闐闐實要津莫問王陽迴九

折崆峒散髮是何人

右東岡使節

銀河飛下九天寒
濺玉飛珠映石欄
盡日迎風看不足
不須奇勝慕王官

右石澗水簾

望中燈火燦班爛
獨有高人靜掩關
世事不須論感慨
都來只隔一溪間

右市橋燈火

春來馬足漲桐溪
片片飛花落岸低
自啓柴門閒倚杖
靜看新水浴鳧鷖

右桐溪春漲

荻花飛盡晚蒼蒼
月照陂塘秋露涼
碧霧漸消光漸滿
悠然一曲和蒼浪

右柳塘秋月

胡總制受王直降有詩志喜因次其韻

出師本意戮鯢鯨
擬掃妖氛繼頌聲
心服已看頻稽首
威加咸各荷餘生
便互總得中權重
處置深知妙

筭成不用拊髀思
衛霍海濱原自有長城

初夏遊烟雨樓

郭外空濛烟雨樓
飛甍巖巖峙中流
三江形勝風濤轉
萬井鶯花雉堞浮
此日雲中見鄉國
何時天際有歸舟
停杯莫惜斜陽下
新月纖纖映遠洲

遊鴛鴦湖示項君

秀水亭前水荇香
鴛鴦湖上浴鴛鴦
遠天簫鼓迎歌扇
倒影樓臺浸女牆
華粲夷猶衝齒齒
竹枝款乃和滄浪
莫言煩暑無由避
月照波光玉露涼

獅子林

古石棱棱古寺西
奇形恠狀類狻猊
虛疑苔館深深見
實有雲生冉冉低
白石燈明禪課了
青蓮花放梵

音齊只愁三宿還生戀惠遠何妨一指迷

樾徑

入門百本循墻樹六月曾教落翠陰乍到只疑天竺國坐來元是比丘林森森古殿丹青剝細細苔花錦繡侵讀罷楞岩時蹤步間關何處語幽禽

古栢

吳中昔有梁朝檜范相祠堂獅子林喬木只應占世澤禪關時許坐鳴琴長廊野鶴巢香葉古殿丹青瑣翠陰深夜蛟龍時一吼獨驚諸葛少陵心

晚步東禪寺

落日敲門到蘭若白雲深瑣青蓮宮循墻老檜凌寒綠滿砌小草含霜紅香供寥寥晤大地梵音杳杳迷

三空玄言一刻已陳迹何日叅得禪關通

憑虛閣

憑虛閣上幾迴來秋氣簫森此日開金殿虛無通碧落青山相對卽蓬萊蒼茫宇宙悲長劍荏苒風塵付酒杯獻賦十年猶未遂愁從西北望三台

懷張子言時寓揚州

君逃世網住揚州我累樊籠滯去留只尺故人不相見飄零江海渺余愁燕南冀北總新句越水吳山非昔遊看劍引杯心尚壯不勞重念敝貂裘

拂水崖分得寒字

虞山西南太奇絕流泉迸出青嵯湍橫分一道地脉裂倒飛十丈天風寒注披射日金光草淨瀉孤雲白

玉盤洪厓華蓋渺何許此時直欲招青鸞

宿石門山

秋老山開錦繡紋石門清氣獨氤氳水深隱隱潛龍
穴巖峻時時過鹿羣芋栗未收看野燒松篁不整度
秋雲地虛疑有仙人宅笙鶴嘈嘈靜夜聞

雪晴堯峰瞻眺

臘日暉暉春欲動山行逸興此時湏深秋磴道餘水
雪且折梅花對酒壺萬里寒雲凝不散一行饑鴈疾
相呼具區只在諸山外指點堯峯入畫圖
白白梅花半吐馨頰頭風急酒初醒朱甍叅錯虛無
見石磴嶮岈次第經天際舟航來片片水中岩壑望
溟溟洞庭春到猶殘雪相對東西雙玉屏

人日望亭舟中

人日常年野寺遊今年人日滯孤舟誰憐杜陵寄佳
句却憶故鄉添客愁忍見風雨忽慘淡不禁楊柳太
輕柔浮名底事牽行樂極目清波雙白鷗

鳳凰臺

玉壘綠江南北分鳳凰臺高高入雲元嘉紀瑞空陳
迹李白題詩真絕羣黃屋靜移鳩鵲影彩霞猶見羽
衣文不湏灑淚新亭上慷慨狂歌日又曛

黃山

江激寒濤殷曉雷黃山門下海潮迴清秋白晝蛟龍
舞翠壁丹崖錦繡開縹緲樓臺依日月虛無雲氣接
蓬萊天風何處飛黃鶴咲指王喬歸去來

聽濤

金沙湖上水浮天，夜夜寒潮到枕邊。
春水扁舟思范蠡，秋槎八月候張騫。
風生蘆葦聲逾壯，月照蕪葭興渺然。
小築茆齋真勝絕，分明杜甫浣花川。

春雨

春雨陰陰十日餘，苔封曲徑掩精廬。
泥深門外無車馬，自向山齋理舊書。

四月

我愛江南小滿天，鮒魚初上帶水鮮。
一聲戴勝蠶眠後，插遍新秧綠滿田。

楚江秋泛爲吳子賦

有客欲登黃鶴樓，掛帆十月辭揚州。
瀟湘月落洞庭

晚巫峽猿啼雲，夢秋攬勝定尋赤壁壘。
浩歌常傍白蘋州，杜陵李白風流在送爾。
扁舟汗漫遊。

春寒

臘盡期春至，春來寒更隆。
凝雲初漏日，舞雪又旋空。
慘慘陰生潤，重重箔護風。
梅花消息近，應只在墻東。

柱山

滄海浩無極，空濛混太清。
寒潮初拍岸，涼月已生明。
烟霧虛塵界，星河動玉京。
三山真可接，知有列仙行。

觀舞追次白樂天韻

張燈留客舞茵開，花鼓闐闐次第催。
拂袖卽看嬌影亂，鳴環真見細腰來。
節遲顧鶴餘流盼，唱遠驚鴻思自迴。
頓履一聲隨樂止，令人思築避風臺。

廣陵客懷

落日停橈古渡頭，繁華人說是揚州。
荒祠不見無雙樹，錦纜空傳十丈舟。
細雨入窓燈黯黯，輕塵撲面思悠悠。
功名何事翻成累，轉憶當年馬少游。

登君山

君山北面大江開，浪觸濤崩天地迴。
雲外孤帆時隱見，望中雙鳥獨崔巍。
空濛烟霧樽前起，瀕洞風塵海上來。
身世只從愁裏過，出羣誰見濟川才。

江上有懷陳道復

誅茆築室傍江隈，地闊河平浦溆迴。
返照趁晴收晚稻，深秋過雨長新苔。
並眠瀟瀟鴻雙雙，見對浴鳧鷺日日來。
苦憶故人城市隔，一杯濁酒爲誰開。

送張十二子饒之京

寡合吾真嬾相知，誰最深那堪鴻鵠志。
各有稻糧心野岸，花爭發長河柳帶陰。
別離未足惜，願爾早爲霖。

竹谷

蔣翊開三益，稽康稱七賢。
風來聲戛玉，月上影含烟。
最喜臨丹壑，偏憐映碧泉。
會心時解帶，消盡世塵緣。

九日懷吳山

九月九日人共愛，吳郡吳山吾獨憐。
湖波盈空天下下，巒容過雨雲澄鮮。
捫蘿攀葛遊人路，擊鼓吹笙何處船。
簪萸落帽誰復繼，空餘嘉話令人傳。

夢中作

羅襦初着照人明，不語階前獨自行。
鸚鵡籠中渾識

得忽然徐喚兩三聲

行春橋

湖上新波沒遠洲行春橋下繫孤舟林間黃鳥聲相應竹裏班鳩啼不休已愛山光和雨潤卽看柳色帶烟柔韶華不爲春陰閣先折梅花次第遊

拜郊臺

越城橋邊拜郊臺越城橋外越兵來越兵一去無消息臺邊野花空自開澄湖水滿放盡舸白日山深生綠苔浮雲不見鷓鴣夷子極目扁舟心轉哀

詠白燕追次袁海潛韻

驚見玄禽故態非雪翎玉首世應稀越裳雉尾姬周化瀚海烏頭漢使歸誤入梨花惟聽語輕霑柳絮似

添衣珠簾不隔涼州路任爾差池上下飛

古籐

古籐偃蹇臥空村歲月侵尋蝕蘚痕詰屈纏綿隨起伏蜿蜒上下欲崩奔渴虬飲澗驚還感玉竦穿雲舞未蟠賴是支離辭世用天真自葆老丘園

次韻董子元亂後見懷

風日簫條獨倚闌高歌強咲不成歡頻年兵燹何時已此日烽烟詎忍看千里故人勞問訊一時黎庶惜凋殘蹉跎歲月驚新夢悵望雲間思渺漫

玉蘭花次韻

玉花千隊映華筵勝賞須知異隔年香透窓紗凝郁烈影搖庭月闌嬋娟歌停莫使空金犖賦就憑誰襞

絳箋若向揚州比瓊樹未應聲價讓渠專

劉給諫約遊西山不果

燕山西面擁皇都曲曲樓臺罨畫圖瑤草琪花紛
玉澗璇題金闕映珊瑚烟霞自昔稱靈境風物如聞
在給孤只尺紅塵不能到夢遊何日訪蓮壺

宴董學士新堂席上以碧桃花為供

學士新堂切禁垣賞筵秩秩詠斯干碧桃和露來天
上玉醴生香出太官棋局往來隨勝負投壺還激罄
交歡獨憐滄海將歸客後會難期強自寬

初夏書懷

初夏新晴事事互定鑪香爇海南竒閒臨涪化羲之
帖細讀開元杜甫詩石鼎颯颯閒闔茗松枰剝啄試

圍棋新篁脫粉芭蕉綠不怕星星兩鬢絲

清秋氣朗庭無來賓蕭然高臥喜而有作

破屋蕭蕭一事無閒窓睡起客來踈空庭日轉清陰
寂脩竹風輕翠影虛筆硯精良開几案雲天縹渺淨
階除此生誰謂儒冠誤養得閒身讀道書

洞庭山岱心灣

太湖波浪拍天浮曾向東山爛熳遊響水澗邊新濯
足莫釐峯上試舒眸金庭玉柱開三界碧水丹山儼
十洲輸與幽人能擇勝岱心灣上築高樓

春來久雨初晴過周公暇斐几齋醉後書壁

一春已過八十日三月惟餘此日晴桃花李花總零
落黃鳥白鳥羣飛鳴湘簾掩映竹色淨斐几拂拭雲

花生莫道韶華去都盡
暫時晤賞愜幽情

陸子虛園賞舞青霓牡丹

穀雨園林萬綠齊
名花驚見舞青霓
朝霞麗日腥紅
暎返照迎風翠暈低
繡幕忝差香露滴
雕闌高下錦雲迷
沉香亭上應如此
却咲清平漫品題

秋日寶塔寺言二尹小集

秋日幽尋物外期
行行出郭得招題
官閒自覺紅塵遠
地勝何妨白日遲
雲散空花堪結社
涼生別院試圍碁
皇都車馬紛馳逐
只隔城闌已不知

送許太僕元復之任滁州

行人欲發柳依依
南望滁陽送落暉
地勝久知林壑秀
官閒更喜簿書稀
慚余濩落人聞少
羨爾褰裳願

不違執手欲言言
不盡夢魂常繞秣陵飛

詠門神

煥然茶壘已更新
覩爾儀容定有神
幸得貨財無悖入
偏於風月自相親
洞開喜有朝來客
靜掩何妨夜扣人
待得功成身已退
朱門白屋一般春

送袁永之會試

冀北多良馬最異是龍春
天子愛神俊應圖徧求
索天閑雲錦羣汗血毛盡赤
袁子千里姿早已奮伏
櫪丈夫志萬里功名夙宿昔
世人愛年少而子今白
皙十四縛儒冠十五期射策
嘉靖四載秋俄然魁選
格鄰里擁道周嗟賞聲嘖嘖
顧我蓬蒿人遂爾雲泥
隔非無扶搖心羞刷冥鴻
翮交期慚潦倒側身長充

斥默坐驚神竄傾想潛動魄忽在瑤華音告我將遠
適僕夫已盈門驪駒就行役杯酒陳祖道風帆催盡
鷓望望黃金臺冠蓋手可炙子今別我去瞻依天只
尺一朝登明堂指顧聲輝赫視草明光宮通名金闈
藉致身青雲上那復戀故宅想君束髮時會合在朝
夕三入金陵城歡好同作客出入共追隨疑義互剖
析聚首十五年分睽心戚戚送子雖容易思子轉愁
劇落日生秋風泣露沾衣掖回首望平川迢迢阻阡
陌梧桐墜葉黃皓月當空白酒酣發大叫浩歌氣填
臆歸期何渺漫別意多感激莫惜雙鯉魚寄我對岑
寂矯首睇飛雲殊覺天地窄出門大江橫燕山馬頭
碧

題畫蘭

光風薄叢蘭奕葉有餘香莫以一枝少九畹亦同芳
人日祝京兆徐子九王履吉集停雲館得題字
今年人日春意動梅花滿枝春草齊一聲倉庚送殘
雪萬里新水生湖堤粗糲強將佳客供細縹還許故
人題難覓令節惟拚醉任性全身學馬蹄

泊儀真

落日不可渡孤雲天際浮乘潮辭白下卷幔入真州
水氣生江霧星光肅斗牛此身何所似天地一虛舟

題袁尚之合歡秋葵

兩兩金英秋露消雙雙翠蒂釵階嬌分明合德同飛
燕並沐新恩出遠條

食霞樓爲周羽士賦

高樓遙見赤城標
笙鶴時來王子高
服食親傳金簡秘
洪厓華蓋幾尋招

霏烟五綵傍樓明
吸盡瑤華禮太清
夜靜時聞環珮響
天風吹落步虛聲

同王繩武彭孔加王子卿袁氏四弟兄及嘉臺二弟登上方

一春常畏雨勝賞及時須
昨對雲岩月今開寶積壺
花飛隨急盞落日動明湖
未得食霞法王高何處呼
宴外舅有斐堂

夫人華屋好綺席
幾迴歡嘉樹雕闌倚銀箏
玉指寒清狂元自愛禮數
本來寬客散堂虛靜開簾待月看

虎丘酌茶送王子美遊揚州

春風含冷動梅花
陸羽泉亭試煮茶
明日扁舟楊子渡
扁丘回首碧雲賒

武王龍艦憶曾過
隋帝行宮萸草多
君到揚州煩問訊
錦帆風景近如何

九月八日登天平

翠壁丹崖劇可憐
昔年曾酌白雲泉
重尋鳥道緣垂葛
醉倚龍門嘯遠天
景物傷心秋色外
樵歌滿耳落霞前
一杯強爲諸山進
明日重陽無酒錢

席上贈祥上人

天平猶未到已見石嶙峋
落日照梵宇秋風吹葛巾
賓朋多曠達雲物任鮮新
麗藻逢支遁吾儕媿許恂

送王祿之會試得姑字

我聞蓬萊之山乃在碧海之東隅雲霞五色成虛無
瓊瓏窓隙翠羽鋪中有玉臺金樹紛縈淡曲房阿室
木鷄珊瑚青苔紫芝石髓菖蒲仙人來止多歡娛迢
遙慮紆何遽遽又聞金華東觀乃在西北之上京台
階清切稱天衢彤樓紺殿黃金扉玉墀丹陛羣公趨
王郎真是天上人手持一顆明光珠秋風別我獻
天子自謂駿馬今應圖看君意氣橫秋空扶搖九萬
誰能拘瞻依日月光沐浴 皇恩殊此時不羨王子
高乘雲跨鶴飛雙鳧王郎王郎真丈夫功名唾手如
轉轡始聞奮翮自白下復道朝天入帝都帝都遙遙
三千里惜別誰忍歌驪駒殷勤把袂重致詞且爲王

郎立斯須相看已有雲泥隔此身那得同馳驅君今
已立白玉堂如入員嶠登方壺我今栖遲原憲貧亦
是飡精鍊液之仙妹撫心茫茫淚如霰望君去去不
可呼望君去去不可呼願解腰間金僕姑

走筆送張主簿致仕還燕

秋老江南木葉凋征人欲發恨迢迢不須更說陶彭
澤五斗從來懶折腰

沈工部桃花書屋

君住桃花塢何如鄭子真應同潘岳縣非是武陵民
香散餘書帙花飛襯舞茵十分春色好劉阮問迷津

石子岡望江

長江望不極劃然射雙眸風帆迅飛鳥却逐東逝流

落霞照寒影爽氣生清秋羈懷三十日何如此日遊

茅山

盤迴繞山足望望山之椒丹崖出殿角落日風蕭蕭
時聞金磬聲還向空中飄聞寂無來踪慮澹滋彌消
閒庭候月出長松生夜濤

送袁補之會試兼簡永之

彙進誰憐貢禹心交期潦倒仲宣襟長河風雪催行
役上苑鶯花幾盃簪海內弟兄三歲別天涯功業二
毛侵張儀自信猶存舌慷慨時歌梁父吟

金陵遇雪

霏霏朔雪滿郊衢此日樓臺氣象殊雙闕參差浮白
玉九門深寂約金鋪斜飄殿角杲恩暗漸積宮墻閣

道迂惟有秦淮萬楊柳獨將春色報 皇都

江

不見長江險寧知天地浮金焦當萬壑日月盪中流
波浪潛鮫室雲霞結蜃樓乘槎吾有興直欲犯牽牛

金陵

此日帝城游風烟入望愁青山映黃屋綠水浸紅樓
高樹宮墻繞新波太液流雨花臺上望無處不盈秋

題老子

出關新述五千言朗目踈髯氣浩然周日曾爲柱下
史回圖今復見神仙

湖上懷王二履吉

湖上晴光劇可憐水清沙白爭娟娟瑤杯停手風生

渚翠管迎船月在天靜裏懷人黃鳥渡醉中開卷白
雲篇落霞一片漁歌起却憶鴟夷思惘然

余有別業在笠澤之上嘗課耕於此因閱黃太
史漁父詞喜而繼作聊以述其自得之樂也

櫺葉新罾舴艋船衝風逐浪去如烟無姓字少牽纏
儂住吳淞不記年

春暖融融雪乍消江頭潑潑長春潮風漸起浪初高
網得江鮮破寂寥

無利無名一老翁筆牀茶竈任西東陸魯望米南宮
除却先生便是儂

山遠江深無四鄰烟波惟有一漁綸鳧鴈侶鷺鷥親
自是人間快活人

吳淞江上是儂家每到秋來愛荻花眠未足日初斜
妻喚船頭看落霞

釣得鱸魚不賣錢船頭吹火趁新鮮樽有酒月將圓
落得今宵一醉眠

八月斑魚逐曉風家家方出釣魚若鰕作餌竹爲弓
睡起朝來日影紅

夜深結網一燈紅吹笛鄰舟攬睡濃雪夜月雨晴風
都是漁家一醉中

臘月捱冰上白魚衝風冒雪欲何如膚欲裂手仍拘
免得求人樂有餘

人日訪沈氏兄弟

新年多雨雪人日尚陰氛世事已如此勞生何足云

草堂誰寄語故友惜離羣他日相思處吳淞江上雲
穀日迎春見雪

雪霰集崇朝紛紛墜復飄春從明日至臘向此時消
不恨遲梅盡行將變柳條豐年應足兆隨意老漁樵
春日東郊訪盧文厚

春日東郊外風光事事新杏梢紅欲破柳色綠初勻
野水侵溪岸輕風起陌塵數椽茅屋底愛爾獨安貧
伯起入山有懷

草草還山去應嫌城市喧避人修靜業散帙愛空門
嵐翠迎窓潤鶯聲入耳繁石湖春色好羨爾獸傾尊
題孫氏清蔭閣次孔加韻

孫侯賜第吳邑東華堂虛敞生清風朱欄繡幙看不
足別開小閣居其中一逕逶迤曲曲通窓前一樹青梧
桐覽輝威鳳下高幹窺人紫燕穿簾櫳清樽坐上客
常滿主人霏雪呈雕龍豈無勲業繩祖武自愛大雅
多春容豈無韜略同儔輩所志不在敵與戎平生已
有清秘癖昂藏獨立羞雷同眼前萬事不如意欲移
王屋追愚公世人嗤君迂且庸胡為不為橫與縱君
言世人知而通胡為碌碌徒書空橫琴在膝月在牖
何必執戟隨揚雄相如逸才命運窮著書不得從東
封赫香獨坐對髹几聊當燕然勒石功

題画馬

閒來快讀馬蹄章任性全身樂正長內廐豈無尋丈
地令人伏櫪憶孫陽

王希堯自瓜州過訪

忽爾辭京口，翩然訪敝廬。寒雲殘臘盡，落月夜窓虛。
世事惟看鏡，生涯好著書。扁舟揚子渡，悵望歎愁余。
春城閒眺

閶闔城頭春草長，綠楊早已滿橫塘。桃如解語垂垂
發，燕亦多情故故忙。雲白天青山疊翠，日高風煖水
生香。無端盡日溪邊坐，典却春衣醉夕陽。

壽郡伯胡公乃翁八袞

君不見西華之山凌碧虛，鍾靈毓秀神仙居。盤礴日
月枕扶輿，廣平方成委丹廬。黃苓紫芝無處無，青鳥
白鶴時相呼。金燈交錯如珊瑚，懸崖窈窕通蓬壺。我
聞維嶽降甫申，山靈集聚多奇珍。異人往往乘時出，

飄飄不縛寰中塵。道高德邵常軼軻，媿殺腐鼠羞鷓
雛。豈無勲業動當世，不勞政事耽文儒。歸來自理山
中屋，整頓松筠友麋鹿。有時長嘯學蘇門，一似陶潛
愛籬菊。三十年餘變鬢髮，閉門不問黃金闕。讀書養
性還灌園，山中四時知歲月。閨風玄圃不可居，閒來
學得餐霞法。洞中僊侶時相逢，八十優游樂無窮。上
友安期浮丘公，下揖子晉葛仙翁。瑤裾玉舄氣瀟灑，
手揮如意談玄空。百年去去卽常生，服食不須毛骨
輕。南極耿耿垂明星，西望佳氣雍州城。綵衣迢迢阻
江麓，養志至今食君祿。高堂不得試兒啼，霞觴遙進
杯中醪。吳門有士臥空谷，爲君高歌鶴南曲。

題蹴躡圖

莫問三郎沉醉無毬場握手咲相呼繁華消歇須臾
事傳得當年蹴踘圖

秦淮間泛

秦淮秋淨水生紋看見鐘山起白雲但得画船常載
酒不妨疊鼓散鷗羣

雨華臺

石頭城裏幾迴遊萬里孤鴻下遠洲落日雨華臺上
望山青雲白正宜秋

走筆和張伯起郊園感懷

澤國風光何處好伍胥祠下百花洲相看只隔盈盈
水帳望還生渺渺愁正是湖山凝遠眺可堪雲日麗
清秋何當獨買扁舟去茶磨山前爛熳游

海棠山鵲

萬里春光蕩冶情海棠晴晝太慙生捲簾不覺游絲
墮忽聽一聲山鳥鳴

滄浪亭

昔日蘇公遊行地于今清勝屬高僧虛亭獨坐渾無
事惟有楞嚴一卷經

對月有懷胡季孚呈孔加伯起

放棹辭城市虛堂早見招停杯新雨歇對月故人遙
愁裏眉頻感風前首重搔翻思前夜別魂向一時消
空侯

春風衆樂奏空侯怨抑多爲君彈一曲公今無渡河
上巳石湖祓禊

風光日漸遲川原淑景移逢茲少長集攬此湖山奇
上侍白髮親正乃芳春時禊事聊爾修觴詠隨所之
心曠神亦怡豈惜滯還期楞伽同曲水三日恣游嬉

新正六日山行見梅花

開歲陰陰今日晴梅花的的照人明入山早已饒春
色對景寧忘感物情海外烽烟無上策天涯勲業媿
浮名明朝人日尤難遣賞得新醅且自傾

二月三日大雪因憶往歲石湖看雪亦是日也
倭夷未寧城中戒嚴不得出遊有懷却寄季孚
憶昔楞伽看雪時梅花萬樹玉參差頻年蹤跡空蒐
夢此日湖山阻亂離俛仰歲時如信宿嗟蛇事業媿
相知春風爛熳原無限只恐時情未及期

玉陽仙選壽史恭甫

玉陽之山雲英英玉女祠前春水泐仙人騎鹿過東
海相邀服食修長生嘈嘈笙鶴來雲輶蔡經初見王
方平有時月底聞歌聲分明馭氣遊蓬瀛人生此樂
真自得百年去去隨虛盈富貴囂然直可輕有才不
用空浮名卽今甲子巳一週巖壑放浪無逢迎君扳
玉樹肯相待我欲從君禮太清

次韻荅李太史

曾試山中茗無如雨後泉浮花凝白乳然竹散青烟
禪榻論文細虛堂晤語玄何當謝塵鞅來結碧山緣
雨後山行次華學士子潛韻

夙有登臨癖新涼豁素襟羣公皆建業高會儗山陰

覽物知時改談玄悟道深水流看不息隨處洗塵心
夢中題朱竹

淇園一雨洗塵埃忽變朱顏破綠苔春夜珊瑚映燈
火丹山赤鳳下瑤臺

題南橋范子潤園亭

仲夏園林好薄陰碧樹重孤花猶灼灼一鳥鳴噤噤
幽逕抽新竹清風奏古松新茶煮初熟有客忽過從
二月一日大雪同孔加魯仲公瑕嘉弟遊廂丘
曲逕深埋短簿祠行行如失白蓮池高臺層疊銀成
砌古木橫斜玉壓枝弭害已占盈尺瑞陽春難和郢
中詩梅花不是違時候只待東風次第吹

暮春遊廂丘

悟石軒前草似茵劍池水滿碧粼粼浮圖麗日諸天
迥新綠敷陰萬樹勻不到一年如隔世尚餘三日是
殘春艱難莫問烽烟事濁酒隨時且慰人

廂丘別諸親友

風日廂丘好諸親送我時殷勤一杯酒已作隔年期
身爲浮名累心猶故國思他鄉見花柳折得寄憑誰
蓮花寺看桃花

貧賤出門難那知花事闌已愁連日雨更怯一春寒
野寺雖牢落天桃猶未殘偶然乘興過隨喜一回看
四飛山莊示肇兒

創業誠非易躬耕也自便儉勤知有益辛苦自無愆
已喜通阡陌還宜近簡編會深畊讀理應自有豐年

訪唐應德荆川別業

久負論文約相違頻夢君碧山開別墅白社瑣閒雲
會晤偏難值懷思空未聞王猷興盡返鼓楫動鷗羣
期遊平山堂不果

春盡揚州水拍堤堤邊楊柳綠絲絲高懷擬向平山
盡勝日難將樂事期山色有無空秀句心情感慨惜
多岐明朝又逐紅塵去回首烟霞繫我思

和楊弘之大叅遊金山見懷

金山三月暮春遊麗日澄江銷客愁自愛洄瀾臨砥
柱非關望海上高丘參差臺殿中天起浩蕩乾坤日
夜浮勝賞已知君獨擅郢中佳句自難酬

早發揚州至邵伯湖

早發揚州路行行邵伯湖輕舟隨社鳥落日下平蕪
汨沒漁舟杳蕭條旅思孤憑將一樽酒隨意宿前途

漂母祠

漂絮淮濱知幾人當時誰復念王孫莫言此日千金
報自是難忘一飯恩

泊舟八里灣

久旱苦無水泊舟八里灣風生沙撲面霞起日沉山
深夜聞愁語侵晨候落關從來知世路羨殺白鷗閒

師家園

水濕舟膠春晝明振衣隨步得閒行萬株楊柳綠堤
右一帶清泉觸石鳴無數青山圍秀色有時黃鳥度
新聲不堪沛北風塵路翻動江南行樂情

連日無水日行五六里十二日自魯橋至石佛
一日過五閘喜而有作

日日問前途還應有水無傳言半疑信欲進且躊躇
忽爾河流駛全消旅思孤一朝行五閘世事若爲虞
南旺

輕風獵獵薄新蒲喜得關河春未徂白鳥衝波隨舴
艚綠楊隔岸喚醍醐千金汶上空遺跡一片江南錯
自呼辛苦驅馳綠底事令人對酒媿漁夫

將至京作

神京縹渺接三台驛路春光景物催魚躍驚濤迎浪
轉燕巢高岸逐風迴射時商賈爭先後候閘舟航滯
去來一自隗生身顯後有誰把酒酌荒臺

潞河道中聞東倭猖獗

滄州去去是天津又逐鷄聲潞水濱世路艱難青眼
盡浮名奔走白頭新柳枝標淺依依近燕子迎船故
故親漸近神京方自慰不堪鄉國有風塵

舟中見白燕

擊鼓開船遡上流行行日已近皇州點波白燕驚
人眼出樹青帘動客愁千里音書空入夢中宵月色
又當頭久拚世事蠅蝸外他日終師馬少游

見月

去去通州道紅塵撲馬鞍行將趨象魏夢已入邯鄲
未問隗生里先彈貢禹冠舉頭明月在不覺是長安
初至京

旅食到京華春深何處花感時空老大獨坐每興嗟
素乏資身策新添羣眼紗出門三閱月無日不思家

明文博士詩集上

明文博士詩集下

兩京國子博士文

彭壽承

廷試述懷

少小習章句朝夕親筆研詞場十度游終迷五色線
行行預計偕迢迢入畿甸皇畿本佳麗瑞靄鬱蔥
倩五城十二樓紫陌韶華徧披褐朝至尊復道隨
羣彥步趨白玉堦日射黃金殿螭頭繞爐煙雉尾開
官扇操筆陳蕪詞來上宸旒獻雖非仲舒策不待常
何薦但願納芻蕘自忘草芥賤

徐李二相公枉駕見過失訝以詩謝之

曲巷幽居暫借棲漫勞方駕駐柴扉驚留拆簡題凡
鳥敢謂虛名動少微忘勢一心期牧仲好賢同志詠

緇衣歸來獨倚衡門望彷彿猶疑見羽旂

嚴相公招飲西城寓直

直廬清切傍西垣退食委蛇赤舄安迂性自慚踈禮
法中厨先已出盤食虛勞吐哺延東閣實媿侏儒飽
大官既醉歸來心獨醒猶思彈鋏學馮驩

邢太史夜坐以雜花插瓶作供

雜花初上映燈光露濕羅襟夜氣涼咲殺風流貧學
士瓶花亂插當紅妝

銀箭頻將玉漏催花枝月色共徘徊
葺宮仙子初回駕無數清香入酒杯

邢太史田錦衣集神樂觀

琳官秋淨擁樓臺仙侶同游院院開
白晝漫憑棋局

遣清風時送酒杯來高槐承日敷清蔭
老栢食霜蝕紫苔回首又隨車馬足始知靈境少塵埃

送朱子价

辭家是三月楊柳正依依忽爾歲云暮
燕山朔雪飛已驚物候改况復故人歸
獨坐不成寐時時歌式微
再承李閣老見過

相國高名山斗如若爲優禮及庸踈
衡門更辱高軒過陋巷頻看長者車
櫪下長鳴悲志業河東有賦待吹嗟
江湖潦倒空雙鬢一任風雲自卷舒

送周子籲入蜀

偶干微祿到長安忽漫相逢斲解鞍
萬里驅馳吾道在三年離別酒杯乾
趨朝始脫滇南路遠宦寧辭蜀

道難使節重迎餘澤潤錦江春色幾迴看

登報國寺佛閣

送客出都門鬩鬩車馬喧言尋靜者室因得給孤園
蹇與塵囂遠閒將貝葉翻偶從高閣望寒色滿平原
次韻馬內翰

燕山朔雪未全消銀燭淋漓吐絳綃壯志未酬顏駟
老華筵喜預孟公招厭厭不醉歸何夜小小歌聲聽
轉嬌一刻鄉心雙髻改幾回搔首望層霄

至日雪晴謁徐相公蒙以

內賜珍珠紅酒留酌賦此謝之

金鑾退食綺筵張積雪真成白玉堂陽至雲霞占有
象清時鐘鼓樂無疆珍珠酒賜天恩重綵縷絲添

日影長吐握未能歌盛德草茆何幸被餘光

除夕答顧汝所

今夕是除夕他鄉憶故鄉懷親千里近清話一杯長
老去心猶壯更深燭有光平生多感慨相對自難忘

元旦朝賀

淑氣迴春滿帝城元辰獻歲泰階平蓬萊宮闕千
門曉闔闔雲霞五色成大地河山開景運中天日月
麗文明一人獨坐逢佳節擊壤康衢繼頌聲

人日雪晴答徐相公

人日雪初晴朝暎映雪明已占吾道泰更喜物華清
霽景融金殿陽和布玉京共知調燮在四海荷昇平
雪晴同呂舍人顧汝所南郊閒步

京華春色好最好雪晴時樹凍初含潤溝水欲動漸
風生塵冉冉日下景遲遲攜手南郊去仙家有酒卮

清明大雪

清明何事雪漫漫始識燕山春更寒遂使鶻鷓鳴較
晚只疑鳩鵲尚留殘風回柳絮綏綏下簾綴珠璣細
細看學得風流陶學士呼童旋掃試龍團

是日約往南郊不果

南國清明花事稀燕山雨雪尚霏霏長安九陌春何
處旅食經年客未歸兩地風光關念切平生事業寸
心違也知空負城南約不是袁安不啓扉

次彭孔加見懷韻

遠書初至日正是憶君時况復經年別何堪兩地思

石湖乘雪興南郭看花期頗有還家夢知君知不知

次張伯起見懷韻

別君銷盡醜然魂老我終慚櫪下轅三禮未陳猶有
恨一杯獨酌更何言春風已動江南柳歸棹行辭薊
北門莫向京華問消息到家應共洗清樽

次張幼于見懷韻

黃金臺下草霏霏日日臺前送落暉覽勝有時趨禁
苑夢歸長夜到親闈故鄉風景心常在 帝里春光
雪又飛看鏡倚樓天萬里浩歌時一詠緇衣

上巳不出

被襖當年在石湖綠油畫舫曠青蒲逸情遠興形骸
外水曲山隈少長俱竹裏桃花山鳥喚水邊楊柳麗

人扶皇州春色來何晚獨坐空齋一事無

出京承徐相公贈詩次韻酬謝

五雲樓閣九重城瞻望何殊萬里程調化共知歌盛
德好賢端不爲修名平生雅度真難值此日新詩更
有情潦倒窮途甘棄擲獨慚虛譽動公卿

夢還家示肇兒

離京纔二日已有夢還家親戚多情話風塵感歲華
共憐鬢髮改不覺道途賒月落雞聲早依然天一涯

鷗

一官辭帝輦南去客途分孤棹迎新漲歸程檢舊文
細流縈落日疎柳拂高雲白鳥沙邊立飄飄自不羣

蟬

高柳咽新蟬初聞思惘然可堪新別處况復早秋天
音逐輕風度心隨餘韻懸故鄉行未至愁劇不成眠

旅泊

旅泊頻驚夢孤村獨繫舟雨餘新漲滿日落晚風柔
爲客徑年久歸程計日酬一杯聊自遣沙上有眠鷗
夜讌朱子价園池

清讌開池上輕風吹樹枝已憐秋氣好正是月明時
玉露沾衣重金尊送酒遲平生好客興爲我更忘疲

中秋遇雨宿江中

本擬中秋夜家庭待月圓蹉跎霪雨裏猶自滯江邊
海氣隨潮上江聲入枕懸夢回天未曙起坐不成眠

哭李冢宰

丹旄飛飛江水濱失聲知己喪元臣誰將消骨陳張
祿終履危機禍長民才擬干將編易折魂銷犴狴竟
難伸山丘華屋尋常理獨有羊曇淚滿巾

官舍敝漏朝來雪霰盈案賦此遣興

官衙清冷思寥寥屋破風高雪不消三瓦未陳珠的
歷四圍多隙紙飄搖寒燈無着愁書濕布被多情怯
夜迢安得杜陵文藻筆秋風茆屋賦長謠

人日立春

佳辰愛人日况復立春時節喜三陽至羹傳七菜宜
未歌高適句且賦道衡詩莫謂家鄉近終成兩地思

過精嚴僧舍

人日過禪寺言修淨業緣鳥鳴簷樹近雲護佛燈圓

佳節尋僧遣新詩洗研傳暫來還暫去不必悟真詮

借得張子昆崙詩抄

不見崙昆三十年偶從僧寺拾遺編歸來細向窻前
讀宿草芊芊淚黯然

曹娥祠

江上濤聲接大荒祠前雙檜鬱蒼蒼孤墳何必山川
麗一死能將姓字揚妙迹已無王逸少題辭空問蔡
中郎真魂不逐寒煙散月落潮迴思渺茫

雨中同李舍人宿靈隱寺

西湖春水拍天浮日日春陰繫我愁沾濕莫辭花下
過空濛自得雨中遊有無轉憶王維句潦倒先拚金
谷籌夜靜不知雲卧冷朝來白雪滿山頭

宿雲堂山樓

舊日西湖路梅花幾度開
蹙拋塵外事乘興雨中來
山逕團青嶂禪房鎖綠苔
一宵清淨業浩劫自輪迴
至山陰
山陰城中花欲舒
山陰城南錦不如
秦碑禹穴猶在
望蘭亭剡曲成丘墟
春光雖已足游賞勝地無柰空
躊躇等閒世事竟陳迹
千載悠悠北伐書

登載山

夙慕山陰勝千峯
羅翠屏探竒窺禹穴
讀記想蘭亭
俯仰悲今昔
煙霞本性靈
空餘載山廟
誰寫換鶯經

龍泉山

曉色姚江上
青山逐霧開
輕風吹竹樹
初日照樓臺

春到花爭發
潮平水自迴
莫言行役苦
勝境且徘徊
鏡湖

鏡湖湖水如鏡平
峯巒盡搖空
明浮雲變隸
自來往輕舟迅邁
勞相迎白鷗雙雙
映山遠青蒲曲曲
隨舟生風流賀老已
千載轉憶悠悠身後名

暮春嘉禾項子長園亭讌集

九十韶華今日晴
名園喜見綠陰成
雲光映水黃鶯
囀草色侵衣白鷺驚
刻竹又重題
姓字舉杯還與說
平生山窮路轉孤
花媚猶見餘春一種情

庭中一竹生意蕭然
春來忽生數筍
喜而賦之
亭亭一竹挺高寒
正對先生苜蓿盤
造化不私深雨露
春風還自長琅玕

五月新晴簡裔同僚

五月官衙樂事多，綠陰清晝午風和。
茶烹雪乳新羅峽，硯洗青花舊斧柯。
翠竹露梢舒嫩葉，文魚依藻泳清波。
一枰碁了人初散，小小宣鑪藝水磨。

糴米

喜得儒官少薄書，清閑真足慰慵踈。
年衰久已知安分，命薄常令意不如。
有祿代耕還糴米，無園種菜敢思魚。
閉門日暮厨煙起，默坐空思嘆索居。

午門朝見時

大內新成

九重宮闕倚天翔，不日功成拱萬方。
三殿昭回還舊觀，五雲縹緲麗晴光。
分明周室營豐洛，不數關中治

未央自媿微臣何幸會也隨鵷鷺侍班行

長安逢郭山人

漫聞東岱覓奇踪，忽向長安道上逢。
大咲仰天無一語，只言日觀最高峰。
羨爾身如不繫舟，飄然五嶽恣奇遊。
長安市上一杯酒，此日相逢空白頭。

題溪南別業

西溪溪水深不流，溪南更築林堂幽。
會心自有濠濮想，乘興不數山陰舟。
一簾暮雨足吟眺，萬疊春山供卧游。
主人方有蒼生寄，惟餘清夢狎輕鷗。

黎內翰惟敬梁中翰思伯携酒見過

未遂幽栖願，聊爲帝里游。
微官常自足，高士每相求。

抗志雙蓬髻端居一敝裘無文驚海內徒自仰前修
喜徐太守子與至席上得陽字

五馬朱輪入帝鄉曾將九折嘆王陽久知惠政同吳
漢更喜文章似子長世事何如杯酒在風塵不見歲
時忙倚闌獨立詩成處萬里青天鴈一行

一麾閩海出明光曾是含香粉署郎行見望之還少
府不妨汲黯卧淮陽天涯媿我空奔走歲暮逢君倍
感傷今日一杯湏盡醉相逢莫咲屈爲邦

連日奔走塵冗懷抱欠佳偶過顧舍人汝由研
山齋見其窓明几淨折松枝梅花作供鑿玉河
冰烹茗啜之又新得鳧鼎奇古目所未見炙內
府龍涎香恍然如在外不復知有京華塵土

賦此紀興

偶入高人室恍然塵夢醒香生金鼎火茶剖玉河水
簷際鳴幽鳥窓間出凍蠅春光遽如許萬慮一時增
除夕與肇兒守歲

莫將除夕感浮生且喜明朝歲又更日月將遷拋舊
曆風塵時逐媿虛名膝前賦就椒花獻盞內香浮栢
葉傾炙手朱門何處是一燈相對候雞鳴

元旦早朝

殷殷仙樂半空聞斗轉河斜曙色分輯瑞羣侯瞻肅
穆履端萬象荷氤氳霏煙彷彿凝三殿霽景招搖麗
五雲四十一年端拱化願歌周頌繼思文
冒雪訪吳侍御時巡警方歸寓善果寺

忽報故人至禪房
蹙解鞍攬衣頻促
駕衝雪不知寒
直指霜威肅風塵
行路難歸來報明
主春色滿長安

出德勝門見杏花

獨坐空齋感歲華
春風日日捲黃沙
閉門無意窺楊柳
出郭驚心見杏花
西望居庸開錦障
北來天壽隱晴霞
驅馳莫問昌平道
野寺含煙落日斜

送韓子游嵩嶽

名山誰最勝嵩嶽
正中天石室有奇
趣天池多列仙
雲霞時萬變日月
晚雙縣曾讀盧鴻
志因君更惘然

贈沈山人

一見出世人澹然
忘物累閒談山水
勝真得煙霞趣
蕭然隨去住所至
興自寓嗟我濁世
姿何由悟三昧

寒夜梁思伯小酌

新寒抱膝掩衡門
上客開筵禮意敦
最喜悟言消永夜
獨憐白髮照清樽
羣賢並集風流映
列坐歡歌咲語溫
醉後不嫌歸路晚
天街塵靜已黃昏

上巳韋園送徐子與得松字

韋園三日宴黯黯
惜離悰攀柳心先
折看花興亦慵
臨流羨清水坐石
蔭高松不是無言
贈無言意更濃
會臺鄆城故墟齊
魯會盟處有子建
讀書臺

齊魯多奇跡鄆城
會有臺當年空戰
伐此日已蒿萊
子建不可作齊桓
安在哉悠然會心
處選勝草堂開

玉河橋見白燕和顧舍人汝和

玉河橋下水生苔
玉河橋邊白燕來
梨花柳絮亂翻

舞浴鷗飛鷺空驚猜金殿雪殘麗鳩鵲瑤臺月冷歸
蓬萊揔道緇塵暗京洛緇塵不染不凡材

四月七日顧汝和明日四十誦杜詩馬上足成
之

四十明朝是清樽今日開煖風吹白晝庭草長蒼苔
玉殿裁書竣金鑾捧詔廻年光容易過羨爾接三台

和姚太史雪中竹

飛雪洒蒼筠分明白鳳翎風廻翻舞袖映月淡疎櫺
掃去茶初熟看來酒易醒更憐人似玉清氣滿虛亭

九月十七日與肇兒夜過呂公祠浦淑縈廻菰
蒲掩映月色如晝真一片江南也適張氏兄弟
携琴阮至酒酣鳴琴撥阮命童子奏笙簫以和

之恍然如在世外三酌而起朗詠成篇

呂公祠下水盈盈秋月無如此夜明爽氣直從銀闕
泠彩雲時向玉杯傾笙簫並奏餘音轉琴阮和鳴雅
調成晤賞未能聊自適不妨明日事還生

是夜令人速王明佐不至至橋上更酌時沈山
人寓張園只尺閉戶却寄二君

帝京車馬日駢闐此夜清游更可憐月色水光相盪
射簫聲琴韻兩悠然王猷興盡乘舟返沈約愁多閉
戶眠勝景慚余能獨占爲君還賦紫雲篇

送張月鹿浙江憲幕

獨抱奇文入帝京風流江左舊知名百年作賦追
平子四海何人薦長卿但有聲華垂宇宙豈須爵位

盛簪纓錢唐江上秋風早閒看寒潮日夜生

送友人游五嶽

五嶽名山天下奇擬從遐覽寄深思
幼輿丘壑真成癖宗炳神游意已移
對月時從僧寺飲看花何必主人期
慚余未脫樊籠累羨爾飄飄任所之

文遠閣

小閣靜沉沉虛明生道心
端居同李泌清悶擬雲林
問字頻携酒談玄時鼓琴
夢回應有得千載有知音

雪晴望居庸山

熹微霽色麗朝暎北望居庸雪正翻
聳處只如瞻華嶽光迷猶似接崑崙
崑瑩奚訝銀山近擁護方知玉闕尊
三白年豐占可兆不妨高卧掩衡門

送秦叅議之任

憶昔當年借榻時蕭條風雨繫深思
吳門別後心常念帝里相逢喜可知
王事有程多遠役旬宣無地不宜詩
携樽未得時相遇况又匆匆重別離

寄嚴相公

昔宰黃扉日常懷綠野游邇來泉石性
翻繫廟廊憂樂事林園勝新詩花鳥愁
懸車明畫錦漢廣莫能傳獨坐

閒齋獨坐晝遲遲
花落花開揔不知
偶傍宮墻騎馬過
鶯聲飛出最高枝

雨過空庭白晝明
虛齋獨坐聽流鶯
春風不道官衙冷
依舊青青蔓草生

春興

帝里逢春春可憐五雲樓閣麗中天御溝花落流澌
盡瑤島雲飛海日懸風度漢宮銀刻箭香生南陌翠
花鈿無由斲醉金錢會零落東風又一年
猗陌塵香輦路斜東風早晚遍天涯建章曉色千門
柳上苑鶯聲萬樹花細草生煙消積雪新波浮玉麗
晴沙五陵年少爭馳逐獨是羈人轉憶家

送華憲副南歸憲副公與其兄皆以少年知名
余與嘉弟亦以是時獲交二公自正德壬申五
十年餘猶復奔走道路而憲副公既登進士歸
老林間其仲子又舉進士余得以儒官爲僚友
適憲副公自錫山至而嘉弟亦以計偕至相與

秉燭夜話感念疇昔雖升沉顯晦不同而白首
愉愉邂逅于數千里外亦奇矣哉因賦小詩識
別而嘉弟作圖於前以見一時會晤之勝

憶昔追隨北角童于今衰老盡成翁青燈小坐傾杯
細白首相逢咲語同顧我弟兄猶骯髒羨君父子盡
登崇一時邂逅真良會莫謂飄飄雪上鴻

七月廿又一日集南郊鄭尚書園亭得城字

十畝芳園倚帝城初秋選勝集羣英柳條未墜霜
前葉池水新添雨後萍濠濮會心真不遠風塵飛夢
此時清振衣更有高臺望無限江南萬里情

廿三日同黎惟敬姚元白許殿卿沈懋學歐楨
伯嘉弟集吳侍御明卿宅得竿字

新秋風日麗長安偶集高齋興未闌縱酒狂歌留勝
賞投壺散帙罄交歡久知燕市多奇骨莫向磻溪問
釣竿陳迹易遷時易改五湖煙水正漫漫

綠水園詩爲陳壽卿賦

名園綠水自先賢繼繼繩繩世永延臺謝由來從簡
樸篇章喜得尚流傳平泉有誓成陳迹獨樂無求得
自全試問辟疆何處所寒煙衰草已茫然

嘉弟久不見至

出門聞說是新春寄得書來又未真消息參差無可
問夢魂顛倒有時親老年兄弟情偏重薄命功名晚
未伸忽爾秋風將又至時時翹首潞河津

林附馬園亭賞紅蓮

主家留客敞華筵一朵紅蓮倚檻鮮太液分來知不
遠葦宮開處自天然秋風入座生陰細曉日窺簾拂
露圓醉後不聞香滿坐銀筆翠管沸遙天

宿通州靖嘉寺

古寺荒煙合巍然三殿存迴廊餘磴石曲逕滿苔痕
歲久梁塵暗庭閒鳥雀喧獨憐車馬客一宿戀空門

平谷公署古槐

僻縣人稀早閉關庭槐合抱挺蒼顏秋深已覺寒蟬
盡日落徐看倦鳥還久歷歲華宜老大不藏丘壑亦
蕭閒有懷欲就東陽賦文藻誰如康子山

平谷道中

捧檄趨平谷西風送馬蹄秋深衰柳變日落晚山低

荒草平原合黃雲入望迷邊城烽火息野老自提携

又

雞聲催曉發露重木綿裘白塔遠先見青山濕未收
小橋看過雨野渡有橫舟處處頽垣在令人生隱憂

遊興善寺

峨眉山外卽長城斥堠無驚秋氣清黃葉擁山飛殿
角青煙出樹隱鐘聲偃松岌業雙蛟舞流水璫瓏萬
玉鳴莫道遐荒多寂寞五雲只尺是神京

歲暮承歐楨伯梁柱臣過有詩見贈因各次韻

京華臘月動風沙獨掩衡門坐日斜驚見高賢朝枉
駕因知短炬夜先花旋沽燕市過墻酒閒數昭陽帶
影鴉自是玄亭甘寂莫一輪春色在誰家

羣英並轡訪清幽首藉堆盤一咲留南望宮墻飛殿
宇北來鬢舍似林丘劇談世事空無據閒看浮雲靜
不流陶謝詩篇公等在慚余潦倒獲同游

至日不出有懷王申二太史

虛齋獨坐靜焚香綵線初添日影長世事驚心催物
候家山入夢惜流光風迴晝漏傳蓬闕雲麗晴空繞
建章遙憶故人天祿閣閒吟襪頌殿東廊

簡黎惟敬直閣兼懷梁柱臣中翰

抱病經旬獨卧家故人只尺似天涯愁添鬢改霜生
鏡歲暮心驚雪作花白日看雲飛桂海青藜然火直
金華清宵只隔宮城月悵望西南五色霞

不出

漫說爲官好常憂室罄懸近承秦御史贈我寫碑錢
飯飽衰年肉薪生冷竈煙從來慵應接且復枕書眠
再過寶塔寺

禁城西畔舊禪房松檜陰陰日轉廊隔院靜聞棋子
落垂簾深護菊花香祗緣帝里紅塵擾始覺空門
白日長兩度經過留不得買山猶自媿支郎

黑山遣祭

帝遣微臣禮國殤荒原衰草黑山陽

朝廷大事惟戎祀邊塞游魂禍犬羊當日捐軀真勇
烈百年報德有輝光慚余蹇拙才情減無復奇文弔
戰場

初轉成均學錄呈同寮諸公

偶轉官階向辟雍橫經分講日愉容彛章品節羣英
聚禮樂陶鎔六館同久傷宮墻沾聖化喜看桃李盛
春風董韓千載聲華重俯仰前修憶二公

人日集顧氏桃花館同集者黎惟敬休承弟顧
汝和諸昆季也

喜逢人日轉青陽燕賞桃花舊草堂七菜漫隨時令
設一杯聊與故人嘗東風早已回明庶柳色行將繞
建章但得弟兄常聚首不妨京國是他鄉

送休承弟之任吉水

東風吹水柳青青送爾遙從吉水行薄祿驅馳南北
路老年離別弟兄情歸鴻已逐春先去駑馬猶餘櫪
下鳴別後相思何處是五雲應接鳳凰城

頌曆

龍樓候曉報雞人玉殿千官氣象新
改歲自慚虛過日授時喜得又逢春
熙微曙色開黃道彷彿鑪煙散
紫宸頒朔從來傳盛事覃恩何幸及微臣

送姚元白考績還金陵

去年送爾出燕京
隔歲相逢更有情
白鷺洲前秋欲老
黃金臺下草還生
往來不異隨陽鴈
身世何如逐浪萍
苦憶舊游行樂處
因君時夢石頭城

送吳侍御出守太平

一麾出守向江南
黯黯離情望去驂
念我獨居空有淚
知君顧影本無慚
英風久已聞當宁
奏疏從來滿石函
今日循良二千石
臺端才力更誰堪

至夜書懷

靜掩衡門晝不開
陽生冬至又飛灰
雪深太液冰初合
柳傍官墻煖未回
弱線自添愁處影
孤燈難盡醉中杯
不禁千里還家夢
長樂鐘聲故故催

玉河春色

春半京華盛綺羅
冰消太液長新波
燕巢香壘依金殿
柳拂流澌出玉河
細草生煙晴日麗
煖雲吹雨落花多
風光流轉須臾事
且向尊前一浩歌

清明大雪因憶十年前
亦是日下雪蓋北方常事而南人則未之見也

清明大雪亂紛披
十載曾逢合更奇
點綴杏花紅艷色
密封楊柳壓新枝
寒侵繡幄冰重見
月冷瑤臺露

下遲說與南人應不信區區莫恠夏蟲疑

袁魯仲改官南部詩以送之

子向留京非避世余慚北闕尚貪名兩行新柳誰爲折
千里歸人已有程心逐去旌隨夢遠酒傾離恨共
愁生還家正是春三月一路看花到石城

贈范職方 文正公孫也

范相風流百代殊諸孫奕奕振三吳承家節操真無
忝復始公侯定不虛自有聲名垂宇宙何妨憂樂異
江湖只今義澤雖猶在願爾重增萬斛租

寄顧克承何有齋

陋室人皆棄惟君興不窮石蒲圓滴露水竹細含風
建盞乳花白沙鑪甲煎紅未能分半席時夢到城東

次韻荅寄黃淳父

寄我瑤華如見面何時風月得平分案陳紫璞依金
鼎障列青山鎖白雲永日和風閒鬪茗孤燈夜雨細
論文窓明几淨心如洗此樂應知獨有君

讀白雪樓詩却寄李于鱗

余與徐子與王元美見所謂五子詩者旣而游
京師見宗子相雖不久亦蒙知愛蘭汀已矣惟
不得見于鱗偶讀白雪樓集悵然有懷賦此寄
之

何處仙人白雪樓山東李白最風流煙霞此日成高
舉丘壑于今屬卧游麗藻時傳驚海內聲華久矣遍
遐陬江湖潦倒空相憶何日相逢解我愁

薛子熙以修史至青州登東山入京將歸四明
纔到青州又 帝京東山奇觀鳳凰城山川壯麗開
胸臆文采風流熟令名喜得持杯論故舊不妨倒屣
下公卿羨君歸興應難阻又送知章返四明

閒齋卽事

帝里豪家競賞春香車寶馬闐鮮新幽居閒看雲來
往草色鶯聲故惱人

清陰寂寂草菲菲此日方知春已歸揔是無花有蜂
蟻翩翩來往繞庭飛

清虛山 卽兔園

青霞片片玉瓊瓏員嶠方壺指顧中喜見平林游白
鹿靜看激水噴蒼龍香生別殿玄都近雲護高臺碧

落通春盡飛花猶滿地分明身在蕊珠宮

虜至

胡兵十萬穴秦城擁騎長驅薄漢京備禦可能無上
策去來何事少先聲中原將帥空推轂此日書生願
請纓弓矢不勞干羽在廟堂應有蒼蒼生

徐子與席上分韻

大火欲西流朝來已立秋老年何易改去客苦難留
別酒翻添恨新詩不解愁音書如可達只尺是皇州

得秋字

溽暑無由避芳筵此日開故人來舊雨天際殷輕雷
傲世空雙鬢浮生且一杯浩歌聊自適隨處可徘徊

得雷字

槐陰團北牖六月自生寒老愛逢迎嬾狂貪禮數寬
不因前日別那得此回歡俛仰成陳迹從知行路難
得歡字

驟雨祛煩暑新涼接素秋清尊閒北海佳客得南州
知已真難遇玄言未易酬不須論去住且復此淹留
得舟字

韋園秋集贈劉君

帝京塵土滿征裘此日城南得勝游昨夜微霜初墜
葉芳原爽氣肅清秋輕風吹酒開涼宇落葉催寒出
御溝直儼韋園作韋曲况逢禹錫最風流

黎惟敬小集得霜字

衡陽轉參畢玉露將為霜涼風起天末肅肅吹衣裳

欣此良宴會蹲舞羅酒漿感時懷隱憂仰睇雪飛揚
又

辭條葉初委柰何草木黃飄飄隨所之萬里天風翔
翩翩送飛鴻卽卽啼寒餐玄言不可悉遠心希皇唐
送友人

送爾飄然返四明孤雲野鶴一身輕不須更乞千秋
觀自和滄浪唱濯纓

送沈君叅政河南

當年夕拜瑣闈郎此日承恩出建章敷奏久知承密
勿撫旬今復見循良風塵去去辭燕薊旌節翩翩指
洛陽行見望之還少府徵書早晚下明光

恭遇

聖駕幸太學

聖主臨雍慶禮成千年文物覩昇平五雲馭日來三
殿百辟承恩下九城象輦乍回清蹕迥鸞旌前道翠
華明小臣何幸躬逢盛豈謂儒冠誤此生

聽講

壁水羣英集盛時橋門觀聽萬人隨乞言已覩臨雍
禮啓沃先尊坐講儀際會明良真喜起周旋品節
自逶迤天顏悅豫親瞻望莫道惟容近侍知

蒙恩賜襲衣

朝罷鑾輿下玉墀臨門駢錫自天垂唱名頒給依金
水叩首親承出鳳池未媿桓榮稽古力獨憐顏駟遇
時遲歸來雲錦生茅屋默坐時歌湛露詩

仲中翰處賦蓬萊閣上仙得長字

木天清切久徊翔麗藻承恩侍建章常自含香歸第
晚每因退食綺筵張春風拂檻花枝繞燕子窺簾柳
浪長要識仙凡原不隔瀛洲不遠帝城傍

春雨書懷

十日春陰不裹巾喜看庭際綠苔新山齋聽雨惟高
卧忘却門前問字人

考滿書事

考績趨隨鷓鷯班天官引奏陞中間三年虛起趨朝
謁此日方親識聖顏只尺天威真穆穆威儀禮數
自閑閑傳宣復職綸音下縹緲徐看扇影還

有感

年來踪蹟任西東萬事都歸一咲中
薊北紅塵虛日月江南白晝又春風
悠悠莫問湟中鹿落落空懷塞上翁
安得高情同叔夜時將雙目送飛鴻

王敬美入京補選過金陵言別同表魯仲高座
寺餞之

仗劍辭家及暮春相逢白下柳條新
擬從北闕霑新命先向南都別故人
細雨斲停僧寺酒煖風輕拂馬頭
塵古來名士多年少看爾飛騰切禁宸

南雍齋宿夜坐呈諸公

永夜沉沉刻漏長碧天如洗露華涼
風生竹樹人聲靜月擁樓臺露靄香
方澤已崇新典禮致齋猶習舊彛章
南都莫謂無禋祀一體君臣肅禘嘗

浴芳亭

永夜池塘暑氣清綠陰圍合午風輕
新篁弄影知魚樂踈柳飛花聽鳥鳴
日轉空庭茶正熟涼生虛枕夢初成
致齋三日全無事夜夜清言坐月明

雨花臺

岩峩雙闕隱蓬萊更有長江天際來
無限江山無限好就中尤愛雨花臺

桃花

春晴緩轡太平堤萬樹桃花暎水齊
不是六朝行樂處直須認作武陵溪

乞休致喜

青衫白髮賦歸歟六館橫經九載餘
承乏獨慚縻廩

文和州詩集下
三
祿引年三上乞休書 聖恩浩蕩容接老茂苑荒蕪
有敝廬待得春風開凍後扁舟南下樂何如

明文博士詩集下

文和州詩

天池

天池之山今始到仰首忽見蓮花峯池水潺湲瀉琴
筑石壁截業青夫容春疇連延麥初熟暮嶺迴合烟
已重肩輿催予下山去悔不此地巢雲松

善權洞

石室山人去不返亭亭一柱玉當門飛流實聽雷霆
鬪恠石虛疑虎豹蹲梁帝斗壇荒草積十仙題字古
苔昏聞道潛通三萬里幾時騎鹿看真源

張公洞

福地真傳霹靂開仰空虛竇看崔嵬千盤磴道穿深

文嘉

休承



黑萬古仇池接往來頗恠洞中常見日翻從地底一
登臺聳身忽自厓間出回首仙源悵草萊

石湖八絕次王履吉

范相祠前水接天越溪庄上柳如烟石湖盡是青油
舫不數西湖有画船

行春橋影臥長虹落日波搖萬頃紅山似蓬萊人似
玉杖藜徐步水晶宮

拜郊臺迥插蒼天茶磨峯高凌紫烟一線太湖雲外
見萬家烟火望中懸

補陀巖下石梁橫醉臥能令萬慮醒亦有蒼藤懸日
月只無江峽闔雷霆

澄碧樓高盡面湖草堂清寂坐虛無倚闌烟水皆鷗

鷺拂檻松杉捻画图

鷓鴣鷓滿晴沙紅杏天飛亂着花十里湖山開画
障一雙小艇載琵琶

村前村後幾家住家家飛杏花如蒸偶然來上岡頭
望鷄犬桑麻似武陵

湖上羣山濕翠濛寺前楊柳綠烟濃越王臺榭千年
恨估客帆檣萬里通

寒山寺

春尋古寺幽相與話前修名豈寒山得詩曾張繼白
樓鍾虛夕照橋影急河流尚恠石龍柱挈雲勢未休

蘭亭

曲水蘭亭宴風光屬暮春豈惟酬勝賞聊用樂嘉賓

酒罰杯無筭書成筆有神翻憐金谷會回首跡俱陳
泛長蕩

孤舟穿葦去冰薄動寒沙水鳥時集樹饑羊晚到家
浮游波上梗飄泊浪中花惟有青山色依然一道斜
已酉冬夜同大姪宿夷亭舟中有懷幼子

臥穩舟如屋更長夜似年懷人聞過雁燒燭檢新篇
犬吠疎籬外潮生曲港前相携阿咸在聽雨得同眠
清湖洲

清湖洲上草痕青沙水流成文字形萬古波濤終不
改舟人指點說寒汀

金牛寺

金牛泉畔古招提常日來遊路不迷問斗尋源幾人

到春風春雨鷓鴣啼

梅林渡

梅林渡口幾頻過水面曾看利涉多萬樹瑤華千尺
浪隔江山水鬱差我

追和元雲林倪徵君江南春詞

三月江南薦櫻筍鳩鵲鷓鴣迴塘靜蛛絲縈空網落
花雲毋屏寒浸嬌影簾外沉沉春霧冷綠蘿欲覆花
間井泥金小扇幃紗巾画橋紫陌踏芳塵 花開遲
水流急江島對眠莎草濕吳姬如花不及摘花咲
映溪流碧楊柳烟籠萬家邑柳下王孫為誰立幽渚
泥香生綠萍閒看梁燕壘經營

婁江

效和州詩
三
婁江流水渺蒼烟無限晴波滿目前冉冉時看鷗鷺
下悠悠疑與海天連風濤隨處喧行客舟楫還能濟
巨川我欲因君泛溟渤乘槎直到女牛邊

虞山七檜

虞山山下七株檜云是梁年天監栽落落離立老氏
廟森森遠映昭明臺風生似聞豺虎鬪雲起直訝蛟
龍來莫言委棄未得用已見磊落俱奇材

濟寧
岳陽樓

及子秋風和州真跡改正

松坡

突兀高城俯碧流城頭縹緲接飛樓坐看汶泗隻波
合隱見龜鳧疊嶂浮賀監清真應不泯謫仙詩律若
爲酬憑闌無限懷賢意目送孤鴻度遠洲

白燕

雙燕翩然下竹扉曉簷霜羽弄輝輝誰言白鳥非玄
鳥肯信烏衣是雪衣小院風輕迷蝶去滄江日暮伴
鷗歸也知自惜奇毛羽不向朱門汗漫飛

與友人釣魚

曠野煩襟豁青天素月流不因同二阮那復此奇遊
磐石偶余契絲綸亦漫投平生釣竿興隨地可銷憂

毘陵道中

暫弭毘陵楫來尋隱者居門前一池水案上數函書
画就雲生壁詩成月在渠盤飧莫兼味聊爲摘園蔬

雪浪閣

雪浪閣前明鏡開崇元觀裏一徘徊松風潭月依然
在只欠仙人跨鶴來

螺子山

螺子山臨北渚湄吾家丞相有新祠停舟展拜斜陽裏一壑松風冷髣髴

快閣

泰和快閣初登處極目江流樹外平記得涪翁當日語澄江一道月分明

蕉石軒

太湖石畔種芭蕉色映軒窓碧霧搖瘦骨主人清似水煮茶香透竹間橋

桃源圖

偶然避世住深山不道携家便不還却恠漁郎太多事又傳圖画到人間

縹緲峯

縹緲峯高幾千丈太湖隔絕欲登難風烟每向詩中得秀色今從画裏看石洞幽玄林屋杳巖嵐層疊莫登寒杖藜何日捫蘿上萬頃平臨縱大觀

小齋蘭花忽開並蒂幼于有詩溲尔次韻書去索咲非以角勝也

久知無喜到貧齋底事幽蘭並蒂開豈有芳馨結良友端憐契分及凡材差差碧葉同心出冉冉清香兩鳳來回首湘江隔烟霧楚歌何事尚餘哀

望廬山

長夏艤舟謝子港正見廬山水面橫隱隱香鑪浮紫翠茫茫彭蠡蕩虛明雲烟誰辨東西寺道路空懸去

文和州詩
五
住情三日舡頭看不厭茲遊真足冠平生

鄱陽湖

彭蠡茫茫欲渡愁趙家圍畔繫孤舟深林禽鳥春偏
樂古岼鼉鼉晚自遊形勝已看吳楚接江湖空抱廟
廊憂莫從道路嗟萍梗且進風前白玉甌

峴山懷友

暮春三月鳥關關乘興來登湖上山碧浪差差浮翠
靄道場隱隱結蒼髮已無蓮宇荒筠外猶有窪樽蔓
草間莫訝臨風倍惆悵故人何在獨躋攀

月夜同友人登盤門城

盤關自昔雄吳郡與客携壺次第行孤塔峇堯撐碧
漢萬山廻合遶秋城河流急映星初見雲樹依微月

倍明取醉但覓今夕興升沉莫問古今情

與子元長卿月下訪道園上人坐月白齋

乘輿叩禪關蕭然水竹間路危應九折屋住只三間
齋白月懸鏡花明菊破顏茶香解留客深夜不知還
郭侍御子靜謫永安

直疏干明主孤臣謫異方寸心元自赤遠道敢辭長
雲皎武夷月風清閩嶠霜丈夫開萬里好去關豺狼
水逢故人

萍逢得故友水宿感烟波笛起關山弄杯停子夜歌
竹深防卧席江近有鳴鼉興劇渾無寐翻嫌月色多
題石田品泉圖

唐子西云水無美惡以活為上故中泠第一

文和少詩
惠泉次之茶鄉乃欲抑江扶惠宜其不能服
石田諸公也幼于以此卷索題因次韻以復
江水山泉偶並嘗新茶初試得清怍已欣陸子能題
品更喜吳君為較量揚子江心真活潑惠山巖下有
清香不須調水將符遍千古清風自不忘

送蔣僉憲之楚中

昔年離別豫章城今日吳門又送行顧我衰頹成潦
倒憐君隨處有逢迎碧虛舊夢金陵月紫綬初垂楚
甸纓蘭棹徘徊莫道發故園楊柳正關情

送顧從化赴荆溪書館次孔加韻

早春江上看雲生顧况仙舟此日行聞道傳經諸子
秀遙知孤坐一燈明山晴預蠟登烟屐茶熟先尋煮

玉鐺世事近來君莫問一編西去好爭名

贈幼于廬墓

埋玉空山裏終天恨可知結廬墟墓側草木動深悲
白日哀號地黃昏風雨時劬勞與念處忍誦蓼莪詩
首夏寒玉亭有懷伯起

春去綠陰成猶聞春鳥鳴雨滋庭草色風度壁琴聲
靜裏流光轉愁中白髮生偶來成獨坐念爾若為情
寺夜子庸有懷戲與聯句

月明古寺已黃昏孤笛聲傳自遠村休承憶得玉人
籠翠袖秋城西畔倚閒門子庸

奉次伯起有懷之作

春山隱隱澹脩眉綽約丰姿冰雪肌聲度曲中楊柳

文和州詩
恨行移月下牡丹枝絕憐公子頻中酒况復蕭娘最
愛詩別後驚魂殊不定可堪連夕雨絲絲

至日子庸振伯小集

木落曉霜溼鄉園日又南親朋欣偶集雲物麗初添
飯煮西湖米香分閩嶠棹不須辭酌酌海國戰猶酣

和唐子畏韻

我昔曾過桃花菴菴中常遇桃花仙吟詩寫畫茅茨
下留客時時費酒錢詩成每向壁間寫酒醉常來榻
上眠春風回首今幾歲屈指經過五十年人生萬事
何足問但願有酒常花前世人妄想慕富貴不知富
貴多前緣窮通得喪固有命貧富壽夭皆由天誰云
富貴勞且忙貧賤驅馳亦不閒高車駟馬衣服鮮奔

走紅塵襪履穿若要心閒衣食足惟有歸耕百畝田

初歸志喜

歸來三徑未全荒拂拭重開舊草堂
斐几淨揩明似鏡研池新浴燦生光
客來親戚情多悅老去詩篇意未忘
莫道歸遲遲亦好猶勝終老滯他鄉

鄒進士吉甫謫廣西

吉州喜見志完生危行危言世共驚
千古高名垂宇宙一時正論重簪纓
投荒萬里誰還惜去國孤身念已輕
我忝相知自疇昔新詩欲賦愧難成

雜題

空江木落思悠悠閒傍蒹葭弄小舟
一段清光君獨占底須回首羨輕鷗

跨馬出郊春尚寒飛流千尺下清湍赤欄橋在垂楊
外付與幽人盡日看

品泉嗜水陸鴻漸墨妙筆精王右軍烹茶寫帖關幽
興日暮看雲懷二君

巖壑層層生紫烟飛泉曲曲下晴川孤琴獨抱何須
鼓流水高山在目前

杜鵑花盛開友人携酒賞之賦此

歸來堂上爛霞明十尺杜鵑開午晴蜂蝶尋芳入朱
戶美人侵曉摘繁英使君已訝甌東種逸士空談閩
嶠名喜見南鄰携榼至圍花傾酒倍多情

渡太湖

九秋霜淨冷菰蒲落日扁舟渡太湖震澤波濤看底

定三江風浪接虛無亂山點點浮蒼玉遠雁雙雙下
綠蕪蝦菜幾時歸范蠡眼中披豁見雄圖

虎丘待月

為愛西丘郭外蒼春來三度到山堂看碑每憶顏刑
部對酒難忘白侍郎石裂道傍誰試劒舟迴溪上客
鳴榔徘徊不是遲歸去要待中庭月一方

七夕

七夕年年乞巧同紛紛祈請走兒童中宵白氣誰能
辨萬古牽牛肯向東樹外綵樓雲縹緲庭前瓜果月
朦朧老儒不用蛛絲喜抱拙携尊醉晚風

羽客載茗

路出華陽遠冠猶碧玉低輕舸載茶具送我過荆溪

山齋二首

山齋雨坐湯焚香几淨窓明竹樹涼午睡起來無一事自翻殘墨寫瀟湘
掃地焚香閉閣眠簾紋如水漲浮烟客來夢覺知何處掛起西窓浪接天

題陳道復画

襄陽墨潘未曾乾十里瀟湘五尺寬樵斧不禁苔徑滑漁簑常傍水雲寒澄澄僧眼連天碧澹澹蛾眉隔霧蟠恐爲醉翁當日寫平山堂上雨中觀

嚴子陵釣臺

崔嵬絕壁映江開落日停舟上釣臺清節已看垂萬古客星何意動三台林間冉冉青松滿烟際飛飛白

鳥來莫向風前倍增感古今名跡幾蒼苔

靈谷寺

帝京雨過氛埃埽下馬來叅第一禪松逕入門猶十里袈裟布地已千年諸公寶塔金身在吳偉長廊粉墨全雲氣常凝陵寢近閒看白鹿下蒼烟

贈陶見塘邑宰

望裏塘非遠悠然紫翠橫水禽飛不定春草夢中生苔雪溪流潤江臯峽浪平近聞消息好花蒲錦官城

贈承天理上人方池

高僧住畔有方池片片慈雲映碧漪長日誦經臨水坐鳥啼花落不曾知

題桂花圖期基聖大姪

吾家二祖舊爲郎相繼登朝立廟堂老我已無繩武
志阿咸好去續天香

彭思菴絕粒百餘日矣茲將登岳陽樓過吳言
別題此爲贈

羨君絕粒事清修袖拂紅塵隘九州東泛已輕揚子
渡南行期上岳陽樓道遙欲棄人間世浪跡真成汗
漫遊我亦采真元有意相携何日到瀛洲

贈徐中洲

徐市求神仙入海竟不返蓬瀛渺雲濤相望歲華晚
中洲海上來眉宇青天開手持白羽扇笑上黃金臺
羊裘客燕巽出入侯王里長揖公卿問飄颻紫雲起
北渡黃河津洛陽多故人終然無所遇歸臥西湖濱

西湖茅屋冷自汲丹砂井明月下青松照見蕭蕭影
振策吳市遊相逢正清秋無人識梅福長嘯空悠悠
何須魯連子世事皆如此生計五湖烟功名一杯水
拂袖赤城虹相思何處逢儻騎雙白鹿招我五陵東
尹陽草堂

卜築尹陽下躬耕非所嗟風烟元水竹雞犬自乘麻
波引太湖近橋橫寶帶斜扁舟吾數到不及尔爲家
後溪

卜築清溪後依然水竹間臨流看泛泛隔屋聽潺潺
村市小橋接危樓暮嶺環紅塵元不到不用掩柴關
採蓮詞

搖棹若邪津紅妝映水新歌聲何處起愁殺采香人

共入荷花去隔花聞笑語擊槳濺紅裳同來采蓮女
秋水灘灘碧荷花渚渚香蕩舟莫擊楫沙上有鴛鴦
雙雙采蓮女各各有春心誰歌竹枝調春心應更深
朝朝采蓮去暮暮采蓮歸朝暮空相守思郎心欲飛
采蓮復采蓮花盡恐傷藕撥掉出花去女伴爭前後
舟中采蓮女岸上游冶子兩意暫相窺無由得雙美
妾欲向花語花應對妾羞溪花與溪女相妬幾時休

兩亭

兩亭渺何許乃在西湖濱昔人雖已遠亭名今尚新
望湖莽烟水白鶴開嶙峋君能仰遺躅弔古披荆榛
慷慨懷往士高風薄秋旻躬為兩亭主揖讓烟霞身
誰敢攀逸駕聊用追芳塵

聞雷記事

甲辰臘月月幾望雨臥滄江聞夜雷豈是潛陽從地
復却疑行令自天垂烽烟西北憂方始飢饉東南力
已摧白髮野人愁不寐起傾餘瀝盡深杯

送吳海峯吏部服闋北上

吳苑春風動征帆回鷁催移忠孤念切許國壯懷開
粉署班猶接金臺轂已推邊陲正多事君有濟時才
送朱希直嘉興教授

橋李之官去還欣士得師土風知尚古鄉語聽常疑
相望只一水來游定四時分襟吾不恨好訪買臣遺
送月泉上人還荊州承天寺

兀兀春寒睡起遲叩門來索月泉詩吾師欲了西來

意月在青天水在池
三載南遊興渺漫扁舟渡海更參禪
補陀岩下蒼蒼月還與山僧夜照泉

題扇贈友人會試

垂鞭約伴看花來紅杏牆頭萬樹開
三月曲江春似海好將新賦獻蓬萊

華補菴服闋北上分得春草自應知

春草自應知春風送客時
可堪南浦恨愁詠北征詩
水遠花飛急天長雁去遲
迢迢江漢意芳杜不勝思

虎丘與補菴叙別

夫子王佐才金門晚通直
騰蹇起當年骯髒辭鄉國
忽枉惠山棹別我滄江側
因為虎阜遊談笑開胸臆

俯拾澗壑孫仰攀鴻鸞翼
同遊捨名勝山川互生色
臨別意難窮功名在努力
而我笑非夫老驥空啣勒
安得從君揚周遊覽八極

滕王閣

帝子久寂寥江花自開落
我來讀殘碑流雲掛虛閣
夜渡湘水

瀟湘一望白雲長梧葉蒼山似故鄉
月色滿空聞夜漏漁歌幾處徹秋霜

湘浦聞猿

江濶淒風起飄飄一舸輕
嶺猿斜日裏猶作斷腸聲
湘江有懷

湘江湘水深如許隔岸佳人隔花語
語罷月明秋滿

天斷續猿聲何處所旅魂夜夜到鄉關覺後相思仍
楚山幾畝欲買君王權愁見湘姬竹上班

詠趙雪林燈帶

細剪冰紈疊浪輕縈絲繚繞雪英英霜凝雲母瑤花
乳水浸玻璃玉片平白燕舞風憐縞袂素娥乘月撫
銀箏瑤臺此夜真如到不向龍宮夢水晶

芝田

燁燁紫芝秀繽紛生玉田氤氳結和氣蕊鬱靄祥烟
雲葉經春暖靈根帶露鮮芳華堪采掇服食侶群仙

樂野

吾慕樂野子蕭然與世違青林玩流水白板掩柴扉
雨過知花落風晴看鳥飛閒來鋤菜甲勝採北山薇

登瓘山絕頂

展游遂上瓘山巔登頓危崖鳥道懸沃若川原紛曠
望清漣湖水共澄鮮圖經誰辨千年後往哲空懷百
代前惆悵偶來還即去無由獨往住蒼烟

送張子行北上

籍甚張公子聲華落九洲十年文共校一日筆先投
已展題橋志兼無去國憂吳門花柳暗看爾覓封侯

送潮溪北遊

君家谿上舊通潮北去還憐道路遙新水正逢春浩
蕩晚山初見鬱岩堯帆開澤國烟濤壯雲接蓬萊紫
氣高惟有別離情不極綠波芳草共迢迢

南巖

幽人北築碧山下草堂正傍南岩開烟霞時從几間
落雲氣每向窓中來倏然東籬採蓮去倦矣西澗携
書回何當日暮一矯首芙蓉削去高崔嵬

送揚州李君之任分水

聞君分水去動我壯遊思山聳慶雲峻溪流天目遲
浙濤應慎渡越樹好題詩儻過桐江上無煩問釣絲

桐山

卜築桐山下蕭然一徑深門開蒼霧合窓鎖綠雲陰
風至洗塵意月寒清道心蹇予思獨往石上鼓瑤琴

今日

今日復今日今日何其少今日又不爲此事何時了
人生百年幾今日今日不爲真可惜若言姑待明朝

至明朝又有明朝事爲君聊賦今日詩努力請從今
日始

明日

明日復明日明日何其多日日待明日萬事成蹉跎
世人皆被明日累明日無窮老將至晨昏滾滾水東
流今古悠悠日西墜百年明日能幾何請君聽我明
日歌

無題

白羅輕扇映芭蕉翠帶無風也自飄一段愁心付江
水魚書欲寄恨迢迢
月明庭院已昏黃團扇風輕夜漸涼自折花枝調鸚
鷓不知金殿鎖鴛鴦

桂枝風冷夜悠悠皓月呈空五采流莫恠停砧不能寐從來閨閣怕逢秋

宮樹輕霜葉葉丹御溝流水自漫漫一從韓媛題詩後時有行人立馬看

春寒惻惻理宮粧雙燕歸來繞回梁風暖晝閒人不到碧桃花下舞霓裳

赤闌橋下水悠悠綠樹層陰逕草幽不是西施美飄戲愛將嬌影照清流

瑤編曾覽梅妃傳素筵新窺點頰圖不似孤山渾寂寞橫斜踈影照西湖

送張立菴邑侯應召之京

清秋風動起新涼驄馬鳴珂入帝鄉三載政聲傳邑

里九重徵召起循良臨民譽在還霄漢濟世才能佐廟廊簪筆朝朝侍丹陛好將民隱達吾王

送崔德卿北上

寂寞一杯酒送君千里行郵亭不折柳上苑好聞鶯崔君少年不得意骯髒江湖弄烟水晚將經濟入承明欵見風烟五雲起吳王城邊秋雨晴長河八月波濤平丈夫晚達君莫恨今日朝廷重老成

天泉

誰見黃河天上來黃山一派接蓬萊飛流直下三千丈倒捲銀潢雪水迴

九日遊勝感寺訪月寮上人

九月九日勝感寺載酒携琴訪遠公古栢參天氣蕭

爽踈林搖日亂青紅山河指點風烟異雲物登臨感
慨同予亦佳名愛重九只無述作繼陶翁

端午日與羅念菴登郡樓

佳晨五月逢端午與客攀躋上郡樓西去群山龍欲
走東來諸水海常流登臨已愛真吾土騁望還能銷
客憂北首長安瞻咫尺浮雲隔斷渺予愁

白牡丹

濃香遍京洛幻此水晶盤承露春風冷尤宜月下看

木筆

紫艷吐朝霞書空咄歲華何當簪爾去日日草黃麻

紫薇

庭下紫薇花點點疑腥血何如獨對時浸此一鈎月

萱

愛爾北堂花秋來色逾好我有懷親憂無由為予掃

次孔加韻贈田金吾

京兆田都尉青山早拂衣詩成惟自詠集罷已忘機
案几頻開畫風烟半掩扉空庭見黃葉猶自一山飛
和吳射陽帝京樂

秣陵自昔好秋光風落天芬滿路香雲月家家搖彩
筆烟花處處闢紅粧畫舫競泛秦淮水寶馬爭馳蹴
踟場莫道近來雕敝也笙歌日日醉重陽

舟中書所見

南京小女嚙青蛾嫁得浮雲水上過坐在枕樓渾不
語祇應雙袖濕青羅

題刻絲蟠桃壽姚秋澗母

織女機絲刻畫勞天孫雲錦爛雙桃瑤池不進尋常
筆剪得鮫人一片綃

同許仲貽趙鷺洲王同橋秦淮秋泛之作

秦淮水色湛冰壺共泛扁舟入渚蒲山遶石城天塹
遠江涵秋影地維孤誰聞沙上歌商女每向波間憶
壯圖爛醉笙歌棹頭去汀禽沙鳥漫相呼

芝溪

燁燁靈芝傍碧溪澄波涵玉漾玻璃幽貞不作明堂
供白鹿時來護竹堤

送趙循齋入覲

十月江南天雨霜萬方玉帛會琳琅河流已喜波濤

息茂苑元知惠澤長舉世幾人先廣漢朝庭今已闕
明堂臨岐不盡瞻迴意拭目林間睇鳳翔

南溪

溪南有茅屋日日面溪流有時倚檻觀白鷗白鷗飛
處青山秋不妨坐釣垂直鈎徜徉泉石忘吾憂

送劉玉橋北上

歲晚江空岸草枯故人舟楫向皇都相逢不盡相違
意寫得天寒欲雪圖

送燕華山會試

燕君策馬向燕山霄漢蓬萊咫尺間無奈春風催
賦桃花一路照朱顏

石橋別

效和州言
愛此白石梁况對橋上月携手素心人而於此中別
歸來明月還照我光濕瑤階露華墮踈鍾不鳴偶回
顧巖城層層已深鎖

暮相思

暮歸月在庭庭花已漸發不見月中人悵望花間月

春雨憶孔加

濛濛細雨集洗滌此幽林虛館絕塵想緬焉懷同音
綠草已盈砌芳醕聊自斟欲往限南北褰裳畏泥深
人生豈有涯歡會當及今無由寫耿抱撫事獨沉吟

虎丘月下送子任赴湖廣憲副

奉使遠持三楚節乘春同作夜山行月浮皓彩天中
見塔繞紅燈樹裏明山色溪聲終古在賞心樂事幾

人并酒闌不盡相違意愁見江頭春水生

陳氏園次韻再送子任

風裊垂楊枝弄柔城闌偶集野堂幽已過佳節愁芳
會又續林燈作夜游杯色盈盈蒲罇酒歌聲嚦嚦隔
花喉武陵桃源花正好此去君應無別愁

送人之金陵

送子秣陵去風烟我舊遊青山雲外寺綠樹水邊樓
塵榻家家下新詩處處留鳳凰臺尚在莫負酒如油

送顧小川典籍使代還朝

星槎八月廻閭闔九天開暫與吳門楫同啣江上杯
滄洲吾尚困青鎖尔真陪自悵風塵侶還憐霄漢才
清秋楓葉赤離思杳難裁既愁津樹遠復恨逝波催

他時相憶處明月照疎梅

送陸玄岳安州別駕

陸機詞賦擅東吳小試卑官鬱大儒易水風烟應似
舊悲歌今有昔人無

一官潦倒易河東簿領紛然嘆道窮聖世百年思禮
樂豈無真識薦王通

○蚕葉圖

柔桑春半葉離離采撷盈筐手自持頻視蚕稠愁葉
盡肯從桃李問花枝

五湖

浪接五湖天澄波凝紫烟蒹葭明遠淑鷗鳥下平川
吟玩天隨句虛無范蠡船一罇消日月彷彿御蓬仙

送周公瑕之金陵次張伯起韻

仲夏園林草木長花間把酒別周郎風塵早已侵愁
鬢柔劔行看上野航獻賦馬卿才未達校書劉向筆
逾蒼只應後夜秦淮月兩地風烟照渺茫

送人游襄陽東岳

清秋掛帆去汗漫采真遊古洞尋三秀仙壇散百憂
風烟元冉冉雲物共悠悠踈豁憑誰寄應登黃鶴樓
病

不謂愁傷肺能令意少歡酒杯渾欲廢書卷厭頻看
事數驚新變衰猶着舊冠壯心零落盡高枕且加餐

送凌道山應召之京

文聲馳故國政譽霽宣春丞相知名舊銓衡得士新

定逢調鼎彝寧復久風塵不盡相違意臨岐一愴神
送華補菴九江還朝

九江欣報政虎阜悵維津績比清流潔情隨白髮新
臨高互曠望撫石愛嶙峋莫訝難為別分襟迹易陳

送門神次石田先生韻

衡明執戟兩閑兵澆酒逢除漫爾榮四序相隨如有
戀一年同住豈無情幾因風雨銷金鎖不為馳驅損
赤纓自古功成身合去肯將流落怨時明

送江陰趙宰

澄江三載嘆賢勞果見徵書起俊髦千里長江增保
障百年吾道立高標堂陰歷歷群黎愛行色蕭蕭匹
馬逢此去五雲知柄用好陳彫傲峇清朝

成化間海南進紅鸚鵡石田先生見而圖之近
予友顧君亦於海南得二翼朱衣翠裳觀者驚
嘆惜不能置之上方耳昔昌黎感二鳥而作賦
予又嘆斯鳥之不遭也

何處珍禽繫碧籠綠衣今已換腥紅聖王方重禽荒
戒零落朱衣野草中

畢潭

畢潭潭邊我屢過風烟近日復如何曾携艇子狎鷗
鷺每憶汀洲足芰荷主人况是陸魯望愛客能為漁
父歌沙明水碧無由往羨爾全家住薜蘿

贈陸虛臯

住近伯通橋烟霞隔市朝齒臨三老近飲赴八公遙

月白時聞笛風清或聽簫承家有賢嗣知不混漁樵
送湖廣族人還

吾宗有賢秀迢遞自衡來遠道兼程發孤舟隔歲回
江潭雙目送春渚亂雲開我亦思先德無由掃綠苔
次錢叔寶韻題鳳山扇

綠柳差差長天飛燕翻波共掠鴛宿渚同依
風外荻芽亂沙邊雲影稀吳娃莫蕩漿濺水濕紅衣
舟雨

日日舟中任兼旬雨勢狂夜蓬驚滴滴曉溜厭浪浪
直恐蛟龍起深愁鳥雀藏垂垂正未已何處覓驕陽
蔣氏西園

聞說西園勝風烟近若何蜀山連嶺秀罨畫引源多

水竹饒魚鳥波塘足芰荷買田吾儻遂乘興數來過
次張伯起韻


偶向溪邊共繫舟風烟隨地得同遊雲開罨畫千山
秀雨歇銅棺五月秋踪跡飄搖疑梗澆乾坤浩蕩與
身浮莫言罇酒論文事煮茗焚香事更幽

贈朱鎮山

君有經綸志今為廊廟材風烟鎮山在竹樹野堂開
隱几浮蒼靄携書映紫苔蹊塗茅塞久煩與闢蒿萊
寄吳半溪

荆溪溪上碧烟虛最愛吳髯水竹居半畝清池堪引
釣一窓疎影礙臨書每因月出常穿徑幾為花開小
住車回首風煙秋欲暮題詩問訊近何如

Table with 15 vertical columns and 10 rows of text. The text is faint and mostly illegible due to fading and a large watermark. The columns appear to contain vertical lists of characters or words.



乘典



